

小謨觴館文續集注卷弟

香墅漫鈔序

昔晉獻王借書輒手刊其謬而梁邢劭又有日思誤書
之言道若不侔其爲實事求是則一也自幹材膚受苟
且寵略於是策爲八十宗鴿爲人日烏杖杜伏獵弄麀
蹲鴟趙肖齊立壯月牡丹麻沙父釜唐本屯毛重性馳
繆更僕難數文籍先生儒林祭酒辯正紕紊篇秩叢興
有唐以來若顏師古李匡又邱光庭之屬嗃矢於前洪
邁程大昌高似孫王楙之徒推波於後是皆說部之權

小謨觴館文續集注卷一

輿稽鏡之淵藪所謂議官之禩家也

一

國朝通儒輩出若亭林潛邱湛園義門諸家各有成書
津逮靡旣數十年來摛詞之士本原或疏研經之流迂
鑿不免至於說文廣雅之學近雖不乏專家然欲其統
括四部勒成一編不求宏深不尙糊關匡正俗詁家喻
戶曉蓋轉鈔其書焉南城曾香墅先生今之劉公是王
深寧也所著漫鈔續鈔又續三編管萃羣典抉剔詭互
別風淮雨丁尾鉤鬚柳卯桃萊犬臺泰壹其辨似若篲
汜畫塗其決疑若繁絲斷刃意行歧秀揭槩以表之昏
索暗室炳燭以朗之碎細分擘切截纖顛所惑鏡澈所



矇煥發揚子雲有言多聞守之以約多見守之以卓若
是書者約矣卓矣夫凡將洵喜久佚其篇无无支文易
消其訓誠得斯秩懸之州閭非小學之指南言音之藻
鏡乎先生閱覽錢詹事述之先生志行吳庶子詳之溝
猶末學復何所言屬委弁端謝不獲已蠡測所及復觀
縷如此若夫向朗校書精於毫齒張蒼爰歷成於期頤
先生味道養和箸饌未艾有若衛武懿戒呂望丹箴昇
日簡末附名猶將泚筆竦之已

晉書齊獻王攸傳就人借書必手刊其謬然後反之

北齊書邢邵傳有書甚多不甚讐校見人校書常
笑曰何愚之甚天下書至死讀不可徧焉能始復校
此日思誤書更是一適李季節曰世間人多不聰明

小謨觴館文續集注卷一 二

思誤書何由能得子才曰若思不能得便不勞讀書
案子才邢邵字 陶穀清異錄南唐王建封不識文
義族子有動植疏俾吏錄之其載鴿字傳寫訛繆分
一字爲三變而爲人日鳥建封信之每人日開筵必
進此味 舊唐書李林甫傳典選部時選人嚴迴判
語有用杖杜二字者林甫不識杖字謂吏部侍郎韋
陟曰此云杖杜何也陟俛首不敢言又嚴挺之傳林
甫引蕭吳爲戶部侍郎嘗與挺之同行嚴弔容次有
禮記蕭吳讀之曰蒸嘗伏獵吳不識伏臘之義誤讀
之挺之白九齡曰省中豈有伏獵侍郎乎又李林甫
傳太常少卿姜度妾誕子林甫手書慶之曰聞有弄
麀之慶容視之掩口 顏氏家訓江南一權貴讀誤
本蜀都賦注解蹲鴟芋也乃爲羊字人饋羊肉答書
云損惠蹲鴟舉朝不解久後尋迹方知如此 劉向
戰國策序本或脫誤爲半字以趙爲肖以齊爲立如
此者多 顧炎武曰知錄刻金石錄者於李易安後
序紹興二年元賦歲壯月朔不知壯月之出爾雅以
爲牡丹 宋祁筆記引蕭該漢書音義漢有屯檇如
爲常山太守又有毛姓云毛伯文王子漢有毛樛之
爲壽張合漢書儒林傳魯伯授太山毛莫如少路毛

應作屯字音徒木切毛屯多相類此傳寫誤耳案
八十宗麻沙俱已見前注不再出他同此例屢見前
漢書藝文志雜家者流蓋出於議官兼儒墨合名
法知國體之有此見王治之無不貫漢書江充傳
初充召見犬臺宮注師古曰今本犬臺有作太壹字
者誤漢無太壹宮也王褒聖主得賢臣頌忽若簞
汜畫塗郭璞爾雅釋宮歧徧注歧道徧出也鄭
康成周禮職金注今時之書有所表識謂之楊檠
李商隱元結文集序其碎細分擘切截纖顛如墜地
碎若大咽餘歐陽詹太學張博士講禮記所味
鏡徹於靈臺所凝冰釋於心泉劉禹錫國學新修
五經壁記以蒙來求煥若星辰以故來趨肅如神明
以疑來質決若著蔡陸德明經典釋文條例用支
代文將无混无蜀志向朗傳年踰八十猶手自校
書漢書張蒼傳年百餘歲乃卒著書十
八篇言陰陽律歷事案文中作爰歷小誤

留春草堂圖序

留春草堂者汀州伊墨卿太守自題其讀書之廬而卽

小謨觴館文續集注卷一 三

以名其詩集也夫四序代嬗惟春爲喜羸萬物棣通以
春爲德始古之閔儒魁墨君子駿雄往往體沖氣於穆
清樂仁化之普被和淖羣動開發德意三朝之正旣慶
六義之蘊用宣於以樹宏猷申藻詠所謂欣喜歡樂
之官也太守疏照鼎門翔輝潭際歸藏樸學勤肄習於
暄辰浴沂高情契襟靈於上哲柘湖波暖遙和汜人之
歌蘭葉煙開旋賦月鐙之會入華林而簪筆侍披香而
薰衣蓬蓬自遠妍華生於楮豪熙熙在顏芳芬馥於齋
閣崔瞻父子雲龍人日之詩王融文章曲水三月之序
固已散葩落藻若庶卉之含英宮下商高應條風之吹

律矣而以畱春名其堂則意有深焉蓋時方策名瑣闥
持憲雲司展鬼薪白粲之書秋茶網密判北寺黃門之
牘夏日城巖獨以慈祥寄其矜惻下噓鑠士則寒谷成
暄上體

帝心則繁霜變露蘇幽局於泉底滿生意於宵中紂絕
陰宮之地永昭青陽天街析木之間常溫園駒於是鹿
柴摹圖鴛溪裂絹岸鋪島織草芳木妍煙嵐媚景而啟
顏雲物烘晴而決眚殆將密贊化育內諧恬曠矣乎雖
然開元含和者氣久而彌醞宣風展義者澤敷而逾遠
大守出臺省典名都形帷所至喻東風之變枯丹忱所

小謨觴館文續集注卷一

四

孚方膏雨之養瘠魚頭赤子援以登臺鶴膝置風教之
剗耜將使杏花菖葉綿煥沐於蒼靈綸幟青旗逗蕃釐
於富媪况復劉樊儷體承翁耆之親顏江鮑齊鑣領煙
花之城郭春暉未艾春祺方來於以頌春令進春觴嘔
咐醞釀曠義滂仁羣生嘒嘒以迎禧萬彙昌昌而薦祉
豈徒眷三重之屋突兀眼前成一尺之集長畱天地已
哉我澤如春寓諸縑素善人得位常作歲星世有同祈
子言爲券

管子四時篇聖王治天下德始于春長于夏刑始于
秋流于冬 鄭康成儀禮士虞禮嘉薦普淖注普大
淖和也 班固東都賦春王三朝會同漢京李善注
漢書董仲舒策曰春秋之文正次王王次春春者天

之所爲也正者王之所爲也三朝歲首朔日也王
勃常州刺史行狀公鼎門疏照六岫翔輝福建通
志汀州府寧化縣潭飛磔重岡複嶺山環水合有田
有池又寧化有柘湖溉田甚廣范致明岳陽風土
記鄭子況爲太守上巳日望鄂渚追想汜人俄有所
見閩汜人歌曰沂青山兮江之湄泳湖波兮晨綠裾
意拳拳兮心莫舒揚街之洛陽伽藍記春風動樹
則蘭開紫葉王定保撫言燕名有崔四日聞喜敕
下宴五日櫻桃六日月燈北齊書崔瞻傳瞻使敕
魏孝靜帝以人日登雲龍門其父陵侍宴又救瞻近
御座亦有應詔詩宴罷共嗟賞曰今日之讌併爲崔
瞻父子王融三月三日曲水詩序李善注武帝永
明九年三月三日幸芳林園敕王融爲序孫述行
裴敦復刑部侍郎制俾踐白雲之司漢書惠帝紀
上造曰上及内外公孫耳孫有罪當刑及當爲城旦
春者皆耐爲鬼薪白粲注取薪給宗廟爲鬼薪坐擇
米使正白爲白粲皆三歲刑也案耐古祗字王融
策秀才文傷秋茶之密網惻夏日之嚴威梁書元
帝紀長徒鑠士特加原有真詰紂絕陰天宮人初
死受事處隋書天文志昴七星天之耳目也主西

小謨觴館文續集注卷一 五

方主獄事昴明則牢獄平案天街析木皆近昴星
呂溫虢州三堂記春之日眾木花坼岸鋪島織沈浮
照耀其水五色權德輿司徒岐國公杜城郊居記
密贊化育內諧恬曠如春之仁如樂之和隋書音
樂志帝居在震龍德司春開元布澤含和尚仁晉
書武帝紀詔曰郡國守相三載一巡行屬縣必以春
此古者所以迷職宣風展義也劉禹錫司空奚公
神道碑銘赤車所至如東風變枯管子輕重甲春
有以傳報夏有以決芸此租稅所以管子而具也
後漢書明帝紀冬無宿雪春不煖沐注言無暄潤之
氣也李賀詩春物太昌昌李商
隱謝河東公啟正人得位長作歲星

湘頌樓詞序

溧陽史君伯劭鐘巫洮之淑靈席蕭邴之門業神智夙
湛瑋執滂流歲路未強已冠孝秀元黃葩藻卓犖軒翥
顧所篤嗜尤在歌詞蓋其珠玉抱質芬芳入懷耀豔深

華於騷爲近於是練昏研曉夏爽淒魄靈妙所寄意象
斯超珊瑚枝海月入其幽襟湘江暮煙疑靚嫺態愀愴惻
憾之旨夷靡案衍之音旣根性真遂成絕詣匪特紹嗣
家法闡南渡祖風而已夫鯨夔喧肆不如么絃之感心
熊豹羅几未若石華之悅口情動於中而形於聲聲成
文謂之樂是亦威鳳一羽足驗五德者矣君今者漳濱
臥疾周南雷滯息子勝斐然之志抱孝章永年之憂論
者方惜其摧撞拂鬱沈落英耀不得賡成莖第雅頌而
君獨流連寸卷冰雪自攜二三素心諄復揚摧其負懷
孤寄非復塵想能窺羸其身昌其莢蕭聊惚恍瞳矐昭
晰羸縮有數光采靡窮以視金石雲陛爛聲炫辭慧業
所存或不以彼易此也

小謨觴館文續集注卷一

六

江南通志溧陽大坏山一名大巫一名浮山孤立洮
湖中洮湖卽長蕩湖水經謂五湖之一 李商隱獻
集賢相公啟一言悟主三接承恩季孟伊絲友朋蕭
邛 洪适隸釋張平子碑高才偉莛與神合契 梁
充與尙書令王儉書丈人歲高未強學優而仕 張
簡文帝與劉孝儀合辭章博瞻元黃成采 文心雕
龍辨騷篇招魂招隱耀豔而深華 司空圖詩賦奇
研昏鍊爽夏魄淒 蕭德藻詠梅詩湘妃危立凍蛟
背海月冷挂珊瑚枝 張鉉史達祖梅溪詞序分鑑
清真平睨方回 梁簡文帝與劉孝儀合此亦威鳳
一羽足以驗其五德 史記太史公自序是歲天子
始建漢家之封而太史公雷滯周南不得與從事
陳琳爲曹洪與魏文帝書聞自入益部仰司馬揚王
遺風有子勝斐然之志 文心雕龍樂府篇謳吟坰
野金石 雲陛

邗上雲萍集序

夫跡之所寄而情寓焉意之所感而詞發焉淺夫蒙心
罔識羣怨雖在羈屑無可攄訝其或擁傳壯遊縮符經
涉卽有興寄奪於浮榮性真不存獻詠無當是惟畸人
騷士蘊魁磊之奇氣負卓絕之瓌姿孤雲一身川路百
織其間都邑之駢坐原澤之珍珠人事之離合歲序之
遷貿悲愉萬端俛仰均感長圖大念隱心而莫宣春鳥
秋蟬含蘖而自語於是冷汰結質鮮容駒華鏗骨滌肌
冰瑩霞炫遇之嗇辭之豐上有日星下有風雅此郭子
祥伯雲萍一集所以洞鑒騷情秀昭江國者也邗上地
小漢鴈館文續集注卷一 七

交川陸古稱華州漕渠崑岡之施軸冠帶衣履之昌丰
僑客游民聯肩疊踵祥伯以無對之才寄孤飄之跡影
溷乎凡瑣心軋乎霄崢資煙月之清真杼襟靈之軫結
千歌百賦久播域中補綴沈吟復成此段以予比歲亦
客茲邦屬爲弁言非同庸受嗟乎祥伯久遊益拙廣交
益孤文采益奇遴選益粹後之流轉未知何方則此詩
歌又將遞續豐茲嗇彼豈真有主宰存耶援筆序之曾
歛彙歎而已

隸釋冀州從事郭君碑攄詩功美表示後生 朱灣
獻湖州崔使君書一身孤雲兩度圓月 鮑照登大
雷岸與妹書長圖大念隱心者久矣 施肩吾下第
春遊詩羈情含蘖復含辛淚眼看花只似塵 皇甫

湜顧況集序翕輕清以爲性結冷汰以爲質胸鮮容
以爲詞王贊方干詩序凌肌滌骨冰瑩霞絢嘉肴
自將不吮餘雋麗不能藻苦不棘癯司空圖詩賦
上有日星下有風雅鮑照蕪城賦梳以漕梁軸以
崑岡韓愈贈崔立之詩朝爲
百賦猶鬱怒暮作千詩轉道緊

七家詞序

六合汪君紫珊以其友袁君湘湄劉君芙初袁君蘭邨
趙君良甫汪君竹素楊君畹香所著長短句附以己作
彙刻之名曰七家詞之數子者著饌宏富非徒樂章茲
以詞舉以藝齊也並世詞人南北林立約以七家以知
限也夫六瑩九韶聲非一律五慕七情動非一端比而
同之不和則繆而汪君乃通其驛騎合爲駢枝豈非以

小漢觴館文續集注卷一 八

吳歛越吟之地晨鳧夕雁之鄉水木明瑟輒孕惠心煙
波眇綿例萃秋士沈吟山澤俛仰翔游蟲聲引愁落葉
迎意或跌宕近局竹屋語癡或欵乃前溪蓑洲笛脆莫
不宮商協應瓊珠互投則所遇同也雲飛泥沈蹤跡或
殊靈稔真想胷次無二如春盎盎情瞳矐而各萌如波
鱗鱗風蕭摵而時起洛濱攘腕寓宇愁於嬋娟阿谷抽
觴發荒寒於融冶趙元叔之蘭蕙鄴文勝之靈芝羽容
霓色月眞可呼珠淚玉煙天亦若瘦則所感同也且夫
浮側趣詭亢鄰於僮鼃咬蔓流靡戾於雅是造弄之末
技非琴旨之正軌數子練情振采離貌含神苟昭藐以

結緒則若孤花之送妍閒摧藏以訴懷則若么絃之成韻遠態疑霧分被六銖之衣澹思當秋遙和七條之玉宋玉景差庶可稱乎別子金荃蘭畹都無忝乎嗣音則所詣同也蛾眉殊貌而悅魄芳草異氣而動魂文通所云斯集足副於是傾崑取瑤聯唱成編灞沟濫沃不嫌源分酥酪醞醞終歸味合語其條例既花菴之繼聲論其別裁亦笛家之法乳已昔迦陵敘浙西六家詞有云倘其秀及江東作者何妨有七今紫珊諸君皆隸江左獨蘭邨以浙籍僑寓秣陵由昔視今若爲補缺詞客有靈當相視而笑也

小謨觴館文續集注卷一 九

荀子王霸篇夫人之情自欲綦色耳欲綦聲口欲綦味鼻欲綦臭心欲綦佚此五綦者人情之所必不免也陳造高觀園竹屋癡語序竹屋梅溪妙處皆不入經人道案周密詞名薈洲漁笛譜樓皓氏刊入知不足齋叢書第八集曹植洛神賦攘皓腕於神游兮楊廷秀李咸用詩序使人發融冶之歡于荒寒無聊之中動慘戚之感于笑談方澤之後後漢書酈炎傳宇文勝州郡辟命不就作詩二篇曰靈芝生河洲動搖因洪波蘭榮一何晚嚴霜瘁其柯哀哉二芳草不植泰山阿文心雕龍體性篇新奇者摯古競今危側趣詭者也輕靡者淫文弱植縹緲附俗者也張衡東京賦咸池不齊度于鼃咬辭綜注鼃咬淫聲也馬融長笛賦聽筵弄者遙思於古昔李善注筵弄益小曲也江淹雜體詩三十首序魂不眉詎同貌而俱動于魄芳草盡共氣而皆悅于魂不其然歟至于世之諸賢各滯所迷莫而論甘而忌辛好丹而非素豈所謂通方廣恕好遠兼愛者哉濁沟濫沃見爾雅釋水

求心錄序

自異家馳說儒法分流學仕二端遂成歧別韋布之彥
佔畢之辰纓被聖哲之言沐浴修齊之訓未嘗不興懷
上理仰鏡前徽鑒蒲密而心儀語鄭阿而色動迨乎旣
釋巾褐遽縮銀黃公府走趨簿領督促司空城旦卽莅
治之寶書金布令甲爲持官之要道智者曲謹冀免愆
尤不肖譎張閒干刑辟其有殫精億慮銳志希賢論建
豎恐來喜事之嫌勉拊循或致迂愚之誚經術吏治迺
爾雨暹是豈循卓之難幾亦非人材之遜古蓋器識不
定則利害易其初心操存不堅則措施乖其素願也方
今三雍化穆五典人愜展義宣風廉能輩出會稽何改

小謨觴館文續集注卷一 十

夫先生代傳素業夙習儒宗從說之書六設通人之文
十篋射諸生之策屢蹟於端門集駁議之篇旁通乎律
本於是庭盈纁帛身傍翰沂代人作箋爲民請命枉平
宜犴哀息嗽鴻固己仁體舉蘇澤同罕樂矣大府重其
幹局勸以策名爰登黃霸以財官屈兒寬於從史始以
長吏歷任典城所至磔其梟狼養以風雨延壽閉閣兄
弟無爭長孺發倉災傷立起董宣強項之令陽球理姦
之才文翁雅化聆匪路之絃歌召父行田樂盈疇之菽
麥征無夜召繼屬而輪租野有宵漁闈行而畏法冠操
秋雲之表下令流水之原遂使車葢一丈榮頴守之屏

泥桑陰四郊立纓公之保社至於陽施長世陰德活人家法本於比干惠心方乎邴相是又仲父所謂心行士謙譬之耳鳴唯恐人知不煩覲縷者矣此求心錄一書則其敷布之緒言循良之左契也原本問學詳示準繩悉其聰明劑其寬猛刻廉而不劇溪盜而不苛體慈惠以養和設鉤距以懲慝思周乎利病織入乎豪芒言若布帛求覽者之易通佩等章絃在臨官之自擇他若教民條約紀事外篇義取垂規道殊自炫雜文間附咸益身心是皆主宰寸衷經歷百折盤根錯節不能撓其志塵勞鞅掌莫得汨其神故能獨出冠倫孤行邁俗處爲修士達爲神君卽此所編可當行實用質司牧兼貽雲祲嚮所云儒法歧塗隱顯易轍者讀書知人斯言可雪已兆蓀清醪三酌未侍子春政論十條熟聞崔寔先生之孫恩焯少列鬻雋壯客諸侯奉其遺經志繩祖武以爲先生茂製自有專書此其筆談先謀問世夫康成禮堂之本守賴於小同僧佑縣譜之成傳歸於傳闕不揆檇昧承命引言亦以發晏楹之語足爲百官之箴味顏誥之辭非徒一門之訓云爾

漢書藝文志儒家者流蓋出于司徒之官法家者流蓋出於理官又云是以九家之說糺出並作各引一端崇其所善以此馳說取合諸侯王充論衡夫富人不如儒生儒生不如通人通人積文十篋以上治

國肥家之術刺世譏俗之言備矣 晉書刑法志應

劬剛定律令以為漢議表奏之曰臣竊不自揆撰具

律本章句 漢書黃霸傳以待詔入錢賞官後復入

穀沈黎郡補左馮翊二百石卒史馮翊以霸入財為

官不署右職 漢書韓延壽傳民有昆弟訟田延壽

大傷之曰不能宣明教化至令骨肉爭訟因入臥傳

舍閉閣思過訟者悔謝 後漢書董宣傳為洛陽令

湖陽公主蒼頭殺人宣于夏門亭候之數主之失叱

奴下車格殺之主訴帝使宣叩頭謝主數不從強使

頓之終不肯俯因敕強項令出 後漢書陽球傳九

江山賊起三府上球有理姦才拜九江太守 漢書

兒寬傳百負租課當免民間皆恐失之大家牛車小

家擔負輪租纏屬不絕課更召最 抱朴子用刑篇

宓生正以率俗彈琴詠詩身不下堂而漁者宵肅矣

後漢書何敞傳注何氏家傳曰六世祖父比干字少

卿為汝陰縣獄吏使曹稼平活數千人征和三年有

姬八十餘謂比干曰公有陰德今天錫君策以廣公

之子孫因出懷中符策九百九十九枚以授比干子孫

佩印綬者當如此算 後漢書袁閎傳論陳平多陰

謀而知其後必廢邴吉有陰德夏侯勝識其當封

管子形勢篇四方所歸心行者也注心行與夜行合

謂陰行其德 隋書李士謙傳或曰子多陰德士謙

曰陰德猶耳鳴 獨聞之人無知者今吾所作吾子

皆知何陰德之有 晏子春秋君子之大義和調而

不緣溪盜而不苛 韓非子觀行篇西門豹性急故

佩韋以自緩董安于心緩故佩弦以自急 後漢書

崔寔傳論當世便事數十條名曰政論指切時要言

辯而

樂潛堂詩集序

式觀虛霏誕孕環靈其有漱沆瀣負星月軼埃超雲千

霜萬古若化人者邈乎負已英淑鍾萃散為異琛則若

小華瑋琇瑜次嬰垣槐江琅玕章莪瑤碧登廷委莽遇

還不齊鴻輝夜色熒熠靡貳其在含生則為魁士方其

淪靈府振芳塵搖襞綈吐飲宮徵情芽言發翰振藻
酒倚旄蔭旗態之焯唄辛茹蓼思之深煙綿春盎韻之
遼黃櫨玉券彩之施要歸於攄寫壘鬱破碎陣敵屏滓
斥凡惟變所適是亦騷雅之松喬莠圃之黎綠矣今趙
君良甫卽其一也良甫茲茲經訓楊李聰辯觸辰權奇
壯學闕達橋仰失蔭配瞻興懷丹穴之鳳飢而待餒桓
山之翼寒而分飛爲庚桑楚僑居畏壘爲闕德潤傭書
會稽爲熊安生教授河朔爲禰處士草箋江夏津頓逋
駭風水奔峭摧撞苑結採弄景光吟聯渚鷗響荅翹鶯
或淒而蒿薤或激而夔鼉或咽而蟬蛸或鏘而鸞鴛時
而幽修蘿荔人語時而晻夔杜蘅野香時而煥赫嫫媼
時而璘彬駢錯自舉玉衣不襲褸裂但咀玉食不吮常
雋骨旣蛻塵寶乃見氣邁會奇隻成其鏗訇不律萬手
瞠遐千里麗則葩粉苦則棘癘質則儉窳文則巫史非
徒才劣蓋有天焉足知盧敖乘蹻走肉擬之則顛摩尼
朗宵積礫當之則敗也或謂良甫寬容霞飾珩奇璧貴
將弛銜道衢賁儀瑚敦賡曲元扈協律大予牢愁茲段
乘韋云爾蒙則謂山圖赤斧不憑藉於軒裳瓊瑰玼華
不加損於緹櫝秀靈胚胎構此英絕蜚聲耀遠藏顯弗
係牙曠立世當薨吾言

山海經小華之山其陽多瑋琤之玉隸次之山其陽多嬰垣之玉槐江之山其上多琅玕章峩之山無草木多瑤碧莊子德充符不足以滑和不可入于靈府案靈府謂心也杜牧李賀詩序雲煙絲聯不足爲其態也水之迢迢不足爲其情也春之盎盎不足爲其和也路史前紀天皇氏靈書八會自然洞神王券十華人風真滄漢書孟喜傳蜀人趙賓飾易文曰爲箕子明夷陰陽氣亡箕子箕子者萬物方蹶茲也賓持論巧慧易氣不能難楚詞九辨驥不驟進而求服兮鳳亦不貪餒而妄食吳志闕澤傳字德潤會稽山陰人爲人傭書所寫既畢誦讀亦徧北史儒林傳熊安生長樂阜城人專以三禮教授弟子自遠方至者千餘人後漢書彌衡傳字正平江夏太守黃祖亦善待焉衡爲作書記輕重疏密各得體宜祖持其手曰處士此正得書意如祖腹中所欲言也抱朴子廣譬篇摩尼不宵朗則無別于磧礫

江行唱和圖序

嘉慶上章敦牂之歲吳江郭君祥伯海寧查君伯揆訪

小謨觴館文續集注卷一

十四

其友儀真宰屠君琴鳴於江北川塗次韻得詩若干首
既彙編之復繪江行唱和圖以紀而索子爲序千里命
駕蘭芷之誼敦二人同心賡酬之辭夥當其荃橈啟夕
芟葢當風延緣聯鼓眄睇極浦滄騰華而沸嶼火照漁
而溜柳架渚潮清沾蓬露漚水宿夢少月昃而問更星
飯影連霞頰而辨旦徒旅奔峭客懷淒戾於是互跋北
渚竝倚南津寓物造端襍然有寫異獨鶴之偏叫類雙
鷓之獻儔有聲必同無善不繼膺泰合舸人瞻若仙豈
期遞絃繁手皆俗激越絕調文鑑聆而奮飛掩抑雙情
潛絞感而欲出均敵競爽竝潰橫發雖濤瀾之中有金

絲之韻焉僕亦道長無此勝緣嗟言斯段旋復興唱以
彼奇姿瑋業邈後陵前慳樂邱園疲精涉頓夔拊龍應
既際願乎矢歌金銑玉徽徒儷音於勞唱于喁答響良
足歛已波戀舊浦雲思故山望得栖翮鄉井連牆野舍
負郭二頃面流一廛鳥赴簷上花羅砌下相與莠松竹
結保社訪丹法語元書津梁之感可無蘆中之吟不作
時或褰裳度澗日晡而卽歸布席映蘿夜久而各醉當
是時也樂可言哉然後還念征蓬迴眺波路愉悴判境
舒慘殊方撫紙札於緘滕慨辛劬於往軫休文愍塗之
賦景真涉澤之篇煙墨相鮮絹素長在向之旅緒罔非

小謨觴館文續集注卷一

十五

譚資因題卷端卽以爲祝也

邱遲還林賦荃橈往來芟蓋經過 沈約愍塗賦日
掩長浦風掃聯葭疊雲凝憤廣水騰華聽奔沸於洲
嶼望晡暖乎煙沙 陰鏗夜發詩濡舳惟識火驚鳧
但聽聲 張纘南征賦聆寡鶴之偏叫聞孤鴻之慕
侶 後漢書郭太傳字林宗歸鄉里諸儒望至河上
車數千兩林宗惟與李膺同舟而濟眾賓望之以爲
神仙焉 江淹與交友論隱書鳥赴簷上水匝階
下 趙景真與嵇茂齊書涉澤求谿披榛覓路

荆石山房文序

文章辭格咸謂肇始東京然自秦漢以來李斯鄒陽枚
乘王褒之屬率皆宏麗抒藻繡錯爲辭由質趨文勢有
必至馬揚而後益事增華儷偶之興實基於此爰逮魏
晉以迄陳隋眾製鋒起雅材彌劭有唐一代斯體尤崇

穎達以之敘經房喬用之論史其於散著塗異原同昧者不咎目爲卑濫是蓋末流之放失以致僞體之滋繁若究其椎輪審其徑遂義歸於淵雅詞屏乎譁囂侔色於敦彝含音乎琴瑟斟酌華實邈遠淫哇作者抗行良無愧矣吳子旣哀其詩屬爲引首復以賦詠襍著是正於予亦雖不多絕去冗俗於前所論殆有會心方今珠璧耀象雲英炳符縟采蘭芬人文蔚列潤色鴻業斯道大昌吳子年富力銳篇什方滋邃學殫精將希齊軌孤竹老馬輒復導先卽以孟晉逮羣斬其勿懈也

郭母迨太孺人八十壽序

小謨觴館文續集注卷一

十六

夫墮眞養志非假靡麗之奉道懿揚嫩弗尚絡首之詞世所欣羨類在浮榮揚母儀者侈璽封之尊遂詠壽人者炫簪紱之駢羅此舉俗之所睎非高軌之所豔菽水可以代鍾鼎蘿薛足以易組纓是有道焉在所自致我友郭子祥伯天授瑋瓊夙蜚英聲藻葩湧流文翰飛走卞和之璞雖懷寶於荆山隋侯之珠已耀采於宇內竊惟明謀式穀功歸於義方震聲坎光道資於坤惠章澤之業請堂之傳也曹穀之賢登櫟之訓也自與祥伯締交撫塵內行克敦嬪則由悉太孺人累葉席美六行合章悃愓婉婉之質教習於儒風女師德象之篇學源於

庭誥迨歸於先丈海粟先生反馬儀成弋雁歌作琴瑟
在御邊豆靜嘉茹蘆有善容之娛僮祁無祿飾之慕守
辟纒之志箐鐙而鳴機辭執珪之榮投畚而偕隱素風
恬尙竝世爲希繼以采芣之艱爰有遣筵之舉太孺人
柔嘉維則肅雍以和塞淵之美娣媵同詞掉磬之聲房
敷息響及祥伯與其弟丹叔之生也太孺人幼而提抱
長而煦濡嚴風淒厲作襦以取溫春日載陽折夔而勸
學遂成競爽互挺雅材玉潤金相豈常均之可企連輝
竝耀爲勝流之所歸於時陟岵早悲循陔待養祥伯昆
季或辛勤以負米或嬖媿以承顏聲聞四騰門業益大

小謨觴館文續集注卷一

十七

著述盈尺各具可傳出客代舍頤頡公卿入投母懷依
然嬰稚以詩歌爲懽筮之奏以編紉爲滄隨之供不朽
盛業華於六珈之褒英絕光譽尊於三釜之養太孺人
顧而樂之怡怡乎莊莊乎燧序代移烝功靡倦蓋顯揚
之義潛見無殊非徒茂幽谷之貞蕤流德門之馨烈而
已屠維之歲長至之辰將躋八袞之齡豫卜十稔之算
祥伯昆季挈冢介之婦曳逢掖之衣烹漸江之魚獻下
若之酒婆娑而舞于囑而歌頌聖善者皆卓越之賢蒙
列子行者率魁閎之都士僑札百輩車笠一堂下索荒
言附之末契太孺人不金玉而富不榆翟而榮不甘晚

而安不芝朮而壽在古祝爵不藉繁詞敬述高蹤用爲
勸侑太孺人其亦覲然而哈油然而酌矣乎

重刊憨山大師法語序

此方教體以音聞應機是以道本無言因言而顯自馬
龍二士首朔宗風能秀兩師分然慧炬後乃輝聯焰續
矩疊規重性相歧分葦麻浸眾雖成明義諦而各判詞
鋒至若三元三要之齊施半提全提之互用逆奪順取
密指顯說類皆待緣以喝通迎機而敲擊不滯影迹脫
略曰窠劣解凡情轉生疑阻醜酬上味反成毒藥古德
所歎良不誣也憨山尊宿生明中葉爲大導師開堂雙

小謨觴館文續集注卷一 十八

徑振綱海南緇白景從所至請益有迷有達或飢或渴
師運廣長舌擊塗毒鼓眾病殊源對治異品若風扇耨
若雨膏穀痼疾昭蘇根莖等潤當時稱善知識者有徧
融笑巖蓮池紫柏心鐙同炳大雲分覆師能和合法乳
隨方利他兼攝禪土並標權實綜貫經教雙遣我法其
要歸於萬行起心其功具於當人日用久參上智既可
直證眞常毛道淺根亦足湔除汙染所謂正法可無臨
濟德山末法不可無此老者非卽大師之謂歟厚夫侍
御今之裴龐精研諄啄之機博究鉗鎚之案獨以大師
法語闡發顯露二諦普通凝睽霄消膺礙曝釋不爭空

有而迷於坑窞不涉箭鋒而墮於滯養斗極破暗羣流
赴淵於以摧慢幢平惱海削情岳超愛河諸妄既祛實
行可蹈世出世間事理圓該寂感誠明靈源不二於是
被練精粹重粹流通非隨喜法門非藉資譚柄欲俾初
地發心之士不必立雪祖庭操篲請席賴此寸編拔陷
扶墜如日親猊座如日聆獅絃且使異學六師屏跡退
舍魔民憐人固可託足大師劬勞之德侍御外護之功
遠識堅誠津逮無量歡喜讚歎序之云爾

楞嚴經文殊師利說偈對佛此方真教體清淨在音
間欲取三摩提實以聞中入 翻譯名義宗釋論主
篇東有馬鳴南有提婆西有龍猛北有童樹 舊唐
書僧神秀傳謂神秀爲北宗慧能爲南宗 裴休釋

小謨觴館文續集注卷一 十九

宗密禪源諸詮序故一代時教開深淺之三門一真
淨心演性相之別法馬龍二土皆宏調御之說而空
性異宗能秀二師俱傳達磨之心而頓漸殊稟天台
專依三觀牛頭無有一法江西舉體全真荷澤直指
知見其他空有相破真妄相攻反奪順取密指顯說
故西域中夏其宗實繁 五燈會元善昭禪師上堂
凡一句語須具三元門每一元門須具三要 有照有
用 僧大鏡五燈會元序 廬一云平醜嗣上味有力
所珍遇斯等人返成毒藥 法華經二尊見大神力
出廣長舌清淨法身 瞿汝稷指月錄鄂州巖頭全
齋禪師曰吾教猶如塗毒鼓擊一聲遠近聞者皆喪
此是第一義 梁肅天台法門議故五時五味半滿
權實偏圓大小之義播于諸部粲然殊流 雲笈七
籤瓜熟蒂落諱啄同時 梁肅止觀統例至使魔邪
詭惑諸黨並熾空有云云爲坑爲窞于文句不
敢動者有流於滯浪不能任者 梁肅開元寺律和
尚塔碑銘烈炬之破昏黑羣流之赴淵澤 傳燈錄
二十八祖菩提達磨寓少林寺有僧神光立雪過膝
悲淚曰惟願和尚 尚
慈悲開甘露門

江寧寓館與樂元淑書

夏首違面涉江而東戲門瑟居儻復徂暑承稔小極當
已大佳日從吳中探訪綦跡音塵闊然飢渴夢寐題襟
舊侶星飛雨絕孤雲僑寄牢愁可知因何槃停覃思不
獲僕以懶散久安賤貧射策東堂本屬謾語戚友學徒
牽帥就道徒以青溪九曲烏巷數家尙有曩知藉申昔
款至於逐侶充賦著麻覓舉首塗之日猶或游移迨抵
白門乃決退舍凡在儕偶咸相詫詖區區寸衷實抱愚
憐揆其可止蓋有四焉髫歲了了見知勝流二親嬌嬈
屬望臻至自念此事雖爲浮榮真得寸尺以爲娛養兩
應京兆五踏省門墜羽沈舟心摧氣折而堂上色笑頓
隔泉壚墓門松楸忽已拱把哀淚盈睫痛思焚書自茲
以往縱具牲鼎何有歡顏若云顯揚此未足數風木之
愴旣切於中華膺之思遂絕於外其爲可止一也制舉
一途卽云小技譬諸巫卜終宜有恆象勺肄勤父師督
促亦復緡大傳學歸藏鑽研秋鐙泯沫夏課閉門而造
自謂愜心試諸有司輒又繆盭數蹶之駕臨莊馘而亦
迷屢失之鵠省括度而奚當况復中年多故舊殖滋荒
憂患累其心輪躑疲其體昔時肄習尙無寸功今此廢
捐更何覬倖其爲可止二也自遇艱棘日就疴羸飲食

失時則病起居不節則病高譚避暑氣便茶如爲文半
首心輒若蕩間或橐筆賣賦代人草牋亦必寬期不耐
敦迫沉可趨立鵠之隊希漸鴻之材焚五夜之樺膏織
九張之心杼乎其爲可止三也且夫進取之事宜審所
堪縱令因時竟得騰上而長安索米艱倍書傭故山牽
蘿疇爲孥寄貧辛之況榮賤勢均飢寒之懷進退皆累
加以性僻形癩情迂跡疏酬酢之畏畏於夏畦冠裳之
苦苦於楛拳纓紱之列豈容昌披嚴徐之倫安有樗散
其爲可止四也具此數事遂絕妄營餘愒所存不更質
告要以虞翻骨寒燭武精亡非樂恬冲非安暴棄自非
執事莫喻鄙懷此閒寓館頗有亭池炎風浹旬忽靛涼
兩秦淮帶水盈盈始波六朝青山含睇疑笑巾褐如海
呬唔成羣獨以蕭閒得領勝趣生平初獲此一奇矣若
夫家室之事稻粱之謀卻顧無資前盼奚藉乘流得砥
亦聽諸造物而已徒輩朋試二旬可畢彼時前旌當莅
茂苑相見匪遠善自葆愛不宣

荅姚春木書

葑溪僧舍行蹤暫畱聯裾倚裳靡閒昕暮權文字之流
別商史裁之異同飛辯之餘閒以嗚噓濃笑之隙襍以
悲歌明明兩心耿耿孤燭自非解人鮮不充耳旣而巴

童戒裝楚榜發夕君行萬里我畱三吳樽酒不空之子
日遠靜言思維輒形於夢昨拜誨帖知已涉江旅食安
健風帆無滯蘆葦葦岸之閒銀山素練之下尚復勤劬
著誤驅染煙墨點勘鄙集尤費丹青寄脉開緘循首訖
尾扶摘纖瑣剖析豪芒自顧何人獲此元賞中間韻語
類多獎借獨於諸文利病倚摭靡遺苟非屬望深摯以
古作者相期烏能捐棄世眼痛相繩切若斯哉十過三
復悚然汗出感哉愧慙不能無言僕自羈卯思學古文
漸稔其難遂巡舍去繼乃探索漢魏沿洄六朝下逮三
唐以迄五季儷偶各體略悉源流竊欲矯厲庸庸歸諸
淵雅藉見古人文筆無分整散不使寡學之士高語起
衰輕詆駢文謂爲應俗而涉獵旣廣見聞龐雜又性喜
馳騁恣筆所之持擇未精遂羸雅鄭一篇之中璫玉錯
見一體之內眞贗迭陳心非不知過乃憚改非盡師友
之寡助亦由持志之不堅耳閒嘗盱衡當代作者數人
迦陵西河承接幾社選學未墜殊有宗風然迦陵佳製
多在湖海樓集世傳檢討四六本屬外篇類牽酬應西
河平瀆頌與秦畱仙書諸首風格遠過齊梁而自所矜
許乃在花燭詞序可謂棄周鼎寶康瓠矣外如漢槎穉
黃麗京慶百體製雖殊咸有可采至於西堂羨門拒石

菌次以及豈績希張諸君繁音靡格古法蕩然無足論
己竊謂斯道近始大昌略舉已逝數公成就各判稚威
以博奧之才出以淵茂橫絕海內無可瑕疵稗存寓奇
氣於澹泊萃新意於古音選練既精庶幾齊騫若叔山
之學魏晉宗之者空疏彛軒之學初唐襲之者肥重簡
齋眞力彌滿而襍糅泥沙圃三瞻采鏗訇而間涉淺易
是皆並世者碩藝林仰鏡然其支流已多派別況在韃
材末學妄思別出機杼其爲紕繆可勝言哉夫虞通之
讓昏表釋眞觀役僧書此俗調之肇端也東京文之引
周秦宋齊文之引漢魏此用近事之證也簡栖作頭陀
寺碑不得不廣羅梵夾梁帝作招眞觀碑不得不旁及
道經此用襍書稗乘之證也僕爲此言非以解嘲良以
少壯知聞歧途錯出持守不嚴自忘漸染踳駁之弊實
由乎此非得足下無以規之卷中嗤點所在敬當書紳
續有造作異時相質耳冬日烈烈飄風發發愛護波濤
珍慎餐寢垂詢諸段別紙具申

與李散收書

籍甚清微邈若星漢睠言元度欽欽在懷僕以韃材繆
事弄筆癡符自詒醬瓿徒覆何意大雅濫垂賞音鈞諧
廉折契遙響於齊絃折揚皇夸得歡心於郢耳洞開藻

鏡湧吐葩詞曾未蓋傾已覘具合流盼所及警欬如通
荷慄之餘申寫難已昔者阮公放曠樂東平之風土五
官馳騁念南皮之舊遊何則蹤跡所託性情存焉童少
所經老大感焉曩在毀齒隨宦邊州地當趙北之陲壤
接幕南之域紫塞拱其左黃河繞其右燕代扼其前磧
鹵倚其後武靈王所拓宇呼韓邪所踏騎每賸春迎夏
風暄草薰鳴沙捲而柳青埃烽銷而榆翠長城窟下水
無嗚咽之音都尉營中花有燕支之色未嘗不徘徊皋
阜延賞林巒葭席敷而桐馬樹煙蕪平而射雉賦至於
嚴霜凋節野擗隕柯雪沍千里冰橫一岸虎豹夾路山
樵望而不前鵬鷲厲空翔禽驚而在下猛飈號晝曜靈
匿其陽暉大角跼秋翰音失其恆響則又隨戎將獵郊
坳扈帶鮫函青莖赤羽弓如霹靂鳴餓鴟於澤中天似
穹廬割黃羊於帳下普梨一曲余朱敕勒之歌琵琶四
絃公主烏孫之樂何其甚壯豈不然歟若乃將軍死綏
烈士橫草憑弔國殤之墓流連表忠之祠銅頭鐵額嗟
興暴於當年直蓋犀軒颯英靈於此日月中石馬恍聽
悲嘶雨後春鉏時逢敗鏃是又陳安瓏上之什馬督汧
城之誅所由歎薄長吟淋漓濡翰者也歲華不居人事
遷易自鼓南楫遂睽北風艱棘丁其躬憂虞耗其智荏

苒甘載蹉跎寸心昔之伉懷猛志逸足盛年今且顛躓
沈頓踈伏蕉萃類壯武之心疾同田光之精亡豫州撫
髀之歎抑塞可知子山思舊之銘生平已矣尙何能追
溯過風躊躇往穀葆幽并之奇氣尋企喻之豪歌也哉
重以足下揄揚過差元賞所存尤在少作承稔遊轍亦
經此邦觸撥振擻不能自默輒復覲縷貢其區區回瞻
朔雲亮均感槩相見有日慎夏自愛不宣

晉書阮籍傳嘗從容言于帝曰平生曾游東平樂其
風土帝大悅卽拜東平相直蓋屏軒見左定九年
傳

與曾方伯書一

小謨觴館文續集注卷一

二十五

元轡迴寒青遠啟震暄辰始屆動履宜安判隔山川抱
佩至眷剖武昌之魚閒逢尺素逐衡陽之雁莫遂翻飛
夢繫波朝思纏肌骨比聞吉語光轉崇階移旃竹於南
天總藩條於東粵高樓明月長憶元規一畝清泉先嘗
吳隱勵孔奮姑臧之節踵孟嘗合浦之風百城望表而
知歸舉部承流而奉職頒條齊政稔所優爲雖然修綱
捨網者理治之恆規也占隱察來者銷萌之善術也爲
邊不可以常智圖易不外乎思艱董簋之飭廉風扇之
而有餘芽孽之藏震擣加之而不足古人沈幾先物弭
患求寧戒凜衣柳綱繆桑土是必有道諒所營心此邦

地控荆揚精分牛女物產饒沃荒穢包羅內則大谷深
巖憑山阻海喻卜陽之屯壘方成公之曲隄萑蒲之眾
太叔何能畢殲渤海之繩龔君亦稱難理外則裨瀛沃
島溟渤稽天琛舶之所飛浮鮫人之所翕集孫盧餘孽
卽跋浪之鯨鯢鵬舫遊魂化磨牙之禦兪至若遐夷合
市殊俗來賓獻婆利之文螺通犂韃之金罽侏儻錯襍
漚鬻駢闐非僅懷柔陰資填撫恭逢三靈和宴玉燭光
昭函夏投鋒郵亭臥鼓康衢載詠漆室奚憂然而陶土
行之臨州不忘運甓岑使君之遏亂所貴生薺珠崖銅
柱之間勤規石畫緩帶輕裘之下中有金城必將遠略

小謨觴館文續集注卷一

二十六

防微瀛壖永奠化封狼爲赤子革飛鴉以好音籌策徒
薪維婁疆索龍驤上帥埽蛾子於張帆魚鼈東明絕豺
心於渡水櫂雲不動關牡無飛然後坐嘯風生彈豪錦
粲增磨厓之鉅製採擊壤之嘉謠是所必圖也不敢不
祝也某自違代舍戢影窮檐孔賓削跡息意於梯榮泉
明扣門拙辭於營飽葭牆艾席聊足隱形橡飯菁羹殊
難果腹竊以五福六極命數攸存九食三旬古賢不免
若欲馳身竿牘胥疏江湖徒弊精神滋增勞辱以是決
策甘守衡茅餓隸窮人聽諸造物而望羊城之驛苦憶
任囂緬峴首之山誰偕元凱敢詡左車之千慮略同重

館之一言庾嶺梅開珠江日永頗盼良訊以作皋蘇

宋書武帝紀捨網修網雖煩易理蜀志許慈傳時尋楚捷以相震撼後漢書度尚傳桂陽賊梁遂

入南海破其三屯北史宋世良傳拜清河太守郡東南有曲隄成公一姓阻而居之羣盜多萃於此人

為之語曰寧度東吳會稽不歷成公曲隄漢書龔遂傳遂曰臣聞治亂民猶治亂繩不可急也唯緩之

然後可治梁書婆利國傳婆利國在秦州東南海

中土多金銀奇寶刺金縷繡織成金縷罽色絨

逆周書王會解九夷十蠻越滬鬻文身後漢書岑彭傳彭元孫熙魏郡太守與人歌之曰我有荆棘岑

君伐之我有蠡賊岑君遏之狗吠不驚漢書東夷傳

蒼長毛也夫無追吠故足下生蒼後漢書東夷傳初北夷索離國王出行其侍兒王令置于豕牢豕

有氣大如雞子來降因有身生男王令置于豕牢豕以口噓之不死復徙于馬蘭馬亦如之王以為神乃

收養名曰東明長而善射王忌其猛復欲殺之東明

小謨觴館文續集注卷一 二七

奔至掩瀟水以弓擊水魚鼈聚浮水上因至夫餘王之焉漢書五行志妖辭曰關動牡飛厥咎亂臣謀

篡晉書祈嘉傳字孔賓清貧好學年二十餘忽窗外呼曰祈孔賓祈孔賓隱去來隱去修飾人世甚

苦不可諧所得未毛銖所喪如山崖且而逃去世甚記淮陰侯列傳廣武君李左車曰臣聞智者千慮必

有一失愚者千慮必有一得故曰狂夫之言聖人擇焉重館見左傳三十一年傳

與曾方伯書二

月日得從化令寄示書知前所申函已徹醅聽伏承侍奉曼福榮問光昭贊伏波橫海之勛埽封豨修蛇之孽戮鯨鯢以為京觀靖瀛渤以作夷庚儋耳珠崖乾晏地謐扶桑窮髮風揮日舒勘定之功偉矣茂矣至於滔天餘黨俊惡渠魁罔不投戈咸皆面縛寬其斧鑕貸以生

全遂占折首之爻足媿攻心之略逃聞露板益仰風猷
竊聞殺降不祥自凜李廣之戒而受降如敵宜思耿秉
之言以彼梟狼編諸蒼赤賣刀買犢何以奠其居東澗
西澗何以區其眾滾之都邑既慮其藏斲散之田疇又
虞其懸耒必將永弭反側長樂畊桑有幹有年無虞無
詐古人左牽制犬右袂操民慎固周防勤思安輯緬諸
連帥定有機宜抑又聞之勝非其難持之爲難趙襄卻
翟之餘轉加憂色主父忘戰之語實曰危機惟勤被廬
之蒐勿狃蒲騷之役所謂慮嫌於方滿守善於已成是
非書策之迂言當亦師干所熟慮也某海隅戢影與外
閒隔非敢蔑榮矯俗自詡孤高良欲保無用以得閑處
不材而全質雖見嗤於華士知有取於達人惟魏應璩
有云人非神仙須仰衣食然居常待終亦援啟期自解
而已去德滋遠不能奮飛尙靳嗣音用當良覲

小謨觴館文續集注卷一 二十八

蜀志馬良傳注襄陽記曰亮征南中馬謖曰用兵之
道攻心爲上攻城爲下亮用其策赦孟獲以服南方
史記李將軍列傳王朔曰禍莫大於殺已降此乃
將軍所以不得侯者也後漢書耿秉傳與竇固擊
車師後王安得出迎秉固司馬欲全功歸固馳謂安
得當先降之安得乃還秉怒徑造固壁厲聲曰受降
降迄今不至請往梟其首固驚起馬足降左思吳都
賦藏斲千人注斲牙也呂氏春秋慎大覽趙襄子
攻翟勝有憂色曰江河之大也不過三日飄風暴雨
日中不須臾一朝而兩城下亡其及我乎漢書主
父偃傳上書曰司馬法曰國雖大好戰必亡天下雖

平忘戰必危 被廬蒐見左傳二十
六年傳 蒲騷見左桓十三年傳

與劉芙初書

春末夏中兩展手告撫序念往臨風感今羽接鷓鴣情
繫鷗鳥白雲南望軫夢乎倚閭青藜夜然疲精於染翰
亮櫻冲抱或損清襟所冀英蕩之節得出乎江淮則苞
栩之嗟稍紓其苑結菰蘆末契寢食祝之僕自方伯內
擢秋卿便挈囊裘移居書局琴心酒德曖有餘思墜雨
秋蒂邈焉興感離索之歎欽欽如何局爲神祠然之簫
鼓黃冠數輩習成猛愚樗蒲歌呼近溷耳目所居牆高
庭不盈丈夜望星斗僅見方隅西鄰城闔雉堞壓屋迴

小謨觴館文續集注卷一

二十九

風蕩激樹葉翻飛終日喧豗疑在濤浪羸僕一二聊供
薪爨朝暮兩飯各需百錢濁醪敗脯強飲強食不暇求
味資活而已清熙文選全秩已刊近與澗蒼商權攷異
渠精力學識十倍於蒙探索研尋匪朝伊夕凡諸義例
半出初裁閒以駢淺補苴其闕聊撮厓略爲足下陳之
夫善注在唐傳本匪一時代綿遠莫得而稽逮乎五臣
注行動以意改正文句字寢失其真後來刊選合并六
臣迷相屢亂崇賢舊觀糾錯滋多北宋單行善本末之
獲觀吳門袁駿以家藏崇寧舊籍影寫刊行雖并五臣
要爲近古茶陵陳仁子本亦當宋末其所據依足資攷

鏡可證尤刻惟此二書餘如元張伯顏以後遞有摹雕
要皆宋本之重儻遂初之別子也延之貴池之役參校
羣籍修改綦多得失互陳非盡善舊而袁茶陵二書校
語如善作某五臣作某類卽所見以爲標分非必崇賢
果真若是盤錯疑互職此之由今茲攷異約有數端其
善五臣之異同有注文具在可循文義定其是非亦有
注乏明文旁引他篇以相較比又他書可證固所必援
亦有兩存不宜輒改注文彼此固當互稽然或概論仍
滋膠滯甄綜鉤索例非一端實事求是歸於當可必無
所攷則亦闕疑其尤所增多則以袁茶陵有無相證又
推求善例以決乖違至於徵引羣書動多闕佚其今所
及覩或散見古籍時有牴牾不皆符同或本有古今傳
有同異或善自刪節略殊元文凡此諸端宜仍其舊弗
槩覩縷以省繁支實係舛訛庶爲舉正其選中諸文分
見史集字句歧別時有參差是必疑義乃爲剖明餘或
兩通亦弗悉出其他脫誤何氏焯陳氏景雲校勘而外
所得尙多案其是非訂其漏落苟此本無誤校語或乖
有載有刪隨文裁度不復一一爲之糾繩要使善與五
臣如篲汎畫塗善本蓄疑如昏情爽曙求其可通易讀
非以示博夸多加曼衍諸書迭相比附恐妨體要非所

敢爲其諸條例件係各卷觀者循繹自可得之若夫義
夥則例繁例繁則詞費或致勞亂貽譏治絲雖經審詳
恐猶不免是在大雅有以匡之書約十卷寫刊逾半更
閱旬時當能蕝事北鴻南來切盼教牘炎威尙熾仰願
珍宜

復屠琴隴書

霰雪冬集津梁路修一江阻於褰裳千里違乎命駕思
君閔嘿心與颺俱伏承綦履枚寔政通人樂懸蒲得眾
破柱懲奸酌威惠之中收鄭阿之效偉哉壯縣卓爾神
君詎惟雅對三雍覃思五際捐精微於學侶稱絕妙於

小謨鴈館文續集注卷一

三十一

詞宗而已哉淮南弊俗惰窳成性飽食以嬉男婦一轍
懸磬比屋而詐習飲羊無褐終年而飾矜墮馬前者羈
寓飶見澆風渤海潁川切賴良牧執事敦崇化本洞燭
教基旣劭農功促修嬪職頒蘇瓊之度樣樹顏斐之桑
麻排比鄉亭量給資力綵麻索縷指挂手經官爲委輸
以爲勸誘極條約之詳審殫導率之周諠務使戶盡鳴
機門無跼屣生事旣瞻仁讓自敦此蓋聖賢之治術康
濟之淵源千載同符百王不易匪直循習吏職補偏救
弊云爾以茲瑋績必得鴻著標記盛軌昭式來旌僕雖
輕材敢辭誼諉容俟暇晷敬竭愚慮先報荒牘用表傾

矜

北史蘇瓊傳蠶月預下綿絹度樣於部內魏志倉
茲傳注顏斐爲京兆太守乃合屬縣整阡陌樹桑果
淮南子汜論訓綵麻索縷手經指挂其成猶網羅
後世爲之機杼勝復以便其用而民得以揜形禦寒

與胡中丞書

日者鋒車南返曾貢芻言嗣聞河決睢隄下淹蒙臺星
馳旌節撫恤漂搖沐雨纒風勤憂可想旋屬兗豫肆逆
盜弄潢池慎固疆圻邊防竄逸紆籌玉帳益悴丹衷比
者虎旅雲蒸蜂屯電埽不煩破斧已慶橐弓足知蚩尤
吐霧無損軒威鑿齒行誅何傷堯化功成閉閼福遐延
洪擊壤之餘敬抒蠡管竊謂民情不皆好亂况

小謨觴館文續集注卷一

三十二

聖德定致時雍何以玉燭方調黃中潛煽羆羆糾蔓數
輒盈千揣本推由責在司牧古無卓魯在上而人欲探
九蒲密政成而戎猶伏莽恭譯

詔書諳切實洞弊原積習因循匪朝伊夕卽有賢者大
率奉行文法無誤繭絲誰復深究治原講求富教力破
常格希風古賢儲未陰牖戶之謀籌曲突徙薪之策故
在平時孝弟廉恥旣化導鮮方逮乎水旱菑荒復拊循
乏術蚩氓素無定志又窘生資屬有姦徒從而簧鼓妖
言熒聽惰俗成風歛以奇衰則良亦爲莠怵以罪福則
智亦成愚蟻聚滋繁狼心遂逞究之滔天巨慝旋踵誅

夷首醜駢殲俘馘載道徒使上勞

宵旰下耗度支白骨膏原玉石同碎雖云數定實足心傷夫致治者不在法制科條而在人心風俗爲治者不在補偏救弊而在正本清源儻使人識尊親戶安耕鑿疇不凜名義疇不戀室家驅之作奸且必不聽縱有蝨賊惑誘何從古云庶民興斯無邪慝又曰衣食足而知禮義此經世之大本非往哲之迂言要其轉移全資長吏方今

宸衷乾惕日昃憂勤方趾圓顛同深感悚閣下斐忱夙勵移孝作忠其何以力飭官聯殫求寔瘼潛萌芽蘖長奠苞桑欲興教先在足民欲足民先精察吏必野多馴雉而後音革飛鴉必澤息嗽鴻而後村無吠犬稔關蓋念延企遠謨若祇以勤劬簿領爲奉公謹愼廉隅爲効職似尙虛於報稱非所望於大賢卓識淵懷亮殊恆惜腐談野語惟乞茹涵靡盬方歌諸所珍護

重建桴亭記

太倉州治南明處士陸道威先生故居在焉有桴亭爲先生講學處歲久侈剝其宅改爲羽人祠嘉慶上章敦牂之歲里人葺亭而新之邑侯董公爲之倡而屬兆蓀爲文以記洪惟我

國家甄靈奠宇耀夏威荒羽族卉儀懷音革狀而又寬
天網恢汪度其有棲谷者彥韜光逸民咸俾全箕頤之
志闡章逢之業於以餐佩唐德權揚儒風自非遭際泰
和尠克遂其高軌矣時則有若容城孫君夏峯餘姚黃
君梨洲蓋屋李君二曲諸尊宿而吾鄉則先生其最著
者先生秉黃中之性希素王之道仰察瓊衡晷緯洞其
革象上窺姚姒危微承其緒言淄川濟南之經傳叔孫
夏侯之禮樂慎到游棣之法術龐煖兒良之兵謀成究
淵微著成部秩有明道學弓冶各殊敬軒康齋肇薛胡
之津派白沙陽明啟陳王之宗風東林主格物而王學
寢微蕺山主慎獨而陳學復熾門戶之判幾於水火先
生篤守履蹈不墮空元獨能參其異同辨厥醕駁宗朱
宗陸湖源以通之主理主心虛己以覈之如河傾懸清
泠灑蕩若農服疇疆判畛分冥索者鏡澈僂馳者善解
詎非鑽仰淵騫鱗差冉雍者歟會丁未造海水羣飛囊
書屢陳虞淵莫挽昭華旣徙延喜攸歸遂乃頤素松阿
構亭講學而以桴顏楣申屠因樹之屋薜蘿交加鄭君
寫經之堂髦秀矜式蓋沐藉昌運非喻蹈海之心植操
幽棲聊存泛宅之志者也年運而往遺基巋然夫過大
梁者猶想夷門思魯儒者不忘淹里仰承

列聖疇覆醜化涵濡綸綍寬大先後載下卽夏餘苞蘖
洛邑庶頑猶子易名加之獎錄矧夫逢子康之介節兼
擅文儒周伯況之高風曾膺纁帛者乎舊蹟堙廢景行
末由鳴工庀材爰復曩構上體揚闡之

聖德下孚式瞻之庶心史宷閭書兩所宜載捧筆避席
請濡牆陰

後漢書光武帝紀贊光武誕命靈賦自甄注甄明也
後漢書馬融傳廣成頌是以明德耀乎中夏威靈
暢乎四荒 宋書禮志殊生詭氣奉俗還鄉羽族卉
儀懷音草狀 魏書裴衍傳沐藉炎風餐佩唐德
漢書藝文志慎子四十二篇名到先申韓申韓稱之
游棟子一篇右法家龐煖二篇爲燕將右縱橫家又
龐煖三篇兒良一篇右兵權謀家 李華德先生張
有略維之諫向使獲親聖人則鱗差耕雍也 王融

小謨鴈館文續集注卷一 三十五

三月三日曲水詩序昭華之珍旣徙延喜之玉依歸
李善注尚書大傳堯得舜推而尊之贈以昭華之玉
尚書璇璣鈴曰元圭出刻曰延喜之玉 後漢書逸
民傳逢萌字子慶案文選范蔚宗逸民傳論李善注
引後漢書逢萌字子康文蓋用選注也 後漢書逸
民傳周黨字伯況 國朝全道望結埼亭集桴亭先
生傳先生姓陸氏諱世儀字道威明南直隸蘇州府
太倉人也作格致篇以自考明亡嘗上書南都不用
後應諸生聘講于東林毗陵
當事者累欲薦之力辭不出

儀徵屠大令輿紡織記

儀徵古真州地大江長淮所襟帶吳檣楚榭所鱗萃兼
以牢盆禹筮之所轉輸而委屬罷民流庸肩摩踵接捆
載鹽監以爲生資男惰於犁耨婦惰於紝組習侈成翼
積嬉成媮外若殷賑而內實皆窳瘵良長姦廩乎號難

治今錢唐屠君由翰林改官斯邑以慈惠字毗以沈毅
糾慝以通敏決劇以清白化俗旣勤勸課稽人趨功昔
之輟耒今多剡耜又以農工儉職業無偏舉穀晝絲夜
事貴兼足邑之婦女目不見漚麻手不狎弄杼強而督
之不苦則謝君謂事非難徇道在引端人非惡勞道在
悅使於是出教約立簿冊籍邑之願紡織者若而人募
吳下之能紡織者若而人能者俾之教學者予以資羅
車軒機官爲辦集絲麻練縑官爲給費成而獻功官爲
收納積而待賈官爲售價甄多而褒察寡而訓戶不分
高庠事不假胥吏自辛未之冬迄癸酉之秋歲凡二更

小謨觴館文續集注卷一

三十六

所習嫻練已有餘利物亦流通乃聽自爲官弗復問比
屋歆動驩然執勤向之傅芳澤坐游熙者一變而密勿
將事晚寢蚤作涼月入巷靜聞鳴梭朝曦映川時見漂
絮匹婦之業足佐丁男摻手所成可贍食指本務具飭
土風還淳物愛故心臧家給故刑措懋哉上理之基也
昔桂陽茨充五原崔實化泉之政不後劭農非獨桑蠶
使之課息誠見九職任而後眾志定眾志定而後四維
張不惑於奇衮不流於倣詭何憂乎鴟義何患乎橋度
事固有瑣而其繫鉅迂而其效神者亦曰求其本云爾
拘牽之士重興作幹局之才薄纖屑夫豈知五雞二彘

春鷓秋蟀古聖經國燭細洞微什百於黃霸米鹽陶侃
竹木者何哉屠君深窺治原符契往哲孤行一意裁制
清衷條格允精則倣斯在嘉績長美件舉則繁此其大
者非文曷紀書實傳信益無愧辭

楊子法言先知篇穀人不足于晝絲人不足于夜之
謂惡政水經注東觀漢記曰茨充字子何爲桂陽
太守民情雖少躡履足多訓裂茨教作履今江南民
知織履皆充之教也後漢書崔寔傳爲五原太守
五原土宜麻桌而俗不知織績寔至官斥賣備峙
爲作紡績織紙練緹之具以教之民得免寒苦

華年四影圖記

吳子楝林繪華年四影圖以眎於予而屬爲之記當其
鍾英虎牙挺奇驥子石麟墮地志蕭穹霄雛鳳啄花聲

小謨觴館文續集注卷一

三十七

在雲路金鋪埒永杏葉羈香騁俱盧舍之平泉選阿涇
婆之駿足鞭細搖柳衣單舉風肩差栗果之少年睥睨
幽并之豪士於是有青原試騎之圖嬉娛林垆饕嗜偉
麗獸肥草淺旣極子丹之游日炙雨淋愛摸伯喈之字
榛煙鬱而在望大川浩其前橫金沙瀾漫恍俯苑伽蘇
碣剗殘時勞波賦類摩挲於銅狄軫軫息於飛僊勝寄
孤懷軼凡超俗於是有江亭覽古之圖旣而抑躬斂華
折節媚學謝耿豪之把槊慕顧歡之然糠子舍鐙紅甲
籤字綠琅函玉券恣厥繙掀蒼頡佐盧窮其半滿遂使
悉曇章體彙儒墨而周流阿難多聞作總持而撰集於

是有秋釭耽誦之圖然而彥倫辨才能名白黑客兒慧
業喜近巷羅捉松枝塵修居士禪叩輒語於導師讖夙
因於法會狎巖中之鹿鳥珠柱晨輝分棒下之龍蛇昏
衢宵燭天龍一指大愚三拳喫趙州之茶參臨濟之喝
立殘庭雪心耀千鎗撥盡鑪灰戒圓五夜於是有薌林
僧話之圖蓋其聰明才韻朗性靈機方夫弄麪之年已
了聚沫之義業緣跡現智以年增怪得姦窮歸真趨寂
可謂深悟法門藉於夙植者矣夫首楞嚴以人生爲旅
宿憍陳如以世界爲客塵凡諸境風能鼓識浪昧者鑠
鞵牽掣覺者順應咸宜苟其心月孤圓光含萬象光非
照境境亦非存則知見兩忘我法胥化屠門酒肆亦可
調心止樂棲蘆皆爲淨土在聖道爲素位在佛氏爲隨
緣影事前塵何分何別是以囑多三藏以觀靜爲非慧
能六祖以拘身爲病盛勤禪師云多生覺悟非干衲張
拙秀才云趨向真如亦是邪此則一點靈臺丹青莫狀
百尺竿頂究竟猶非爲吳子記卽爲吳子進一解也

唐釋元應一切經音義彼繕那亦有大小或八俱盧
舍或四俱盧舍一俱盧舍謂大牛鳴音其聲五里八
俱盧舍四十里也 本草馬梵書謂之爲阿淫婆

一切經音義疏伽沙蒼云恆河此河從無熱惱池東
面象口而出也 翻譯名義集波膩手也 周書耿

豪傳謂所部曰大丈夫見賊須右手拔刀左手把槊
直刺直斫慎莫皺眉畏死 南史顧歡傳夕則然松
節讀書或然糠自照 翻譯名義集悉曇量章是生字

之根本說之爲半餘章文字具足說名爲滿又十二
章悉名爲半自餘經書記論爲滿齊書周彥倫傳
著三宗論智林道人遺書曰貧道捉麈尾來四十餘
年東西講說謬重一時餘義頗見宗錄惟有此始是
黑無一人得者爲之發病非意此音猥來入耳始是
眞實行道第一功德宋書謝靈運傳山居賦企堅
固之貞林希菴羅之芳園案客兒靈運小字梁書
何允傳居虎邱西寺允常禁殺有虞人逐鹿鹿徑來
趨允又有異鳥集講堂馴狎如家禽重刊于寺內立
明珠柱乃七日七夜放光僧大贓重又于寺內立
序龍蛇分于棒下凡聖藉以喝通王中頭陀寺碑
文蔭法雲于眞際則火宅晨涼曜慧日于康衢則重
昏夜曉楊圭十七家注金剛經序道本無言之
則粗禪本無說說之則末所以德山棒臨濟喝大愚
三拳天龍一指無二法門付之無言纔舉話頭且喫
茶去案德山云云俱詳見傳燈錄及五燈會元阿
育王經佛在世時入王舍城乞食見二小兒一名德
勝二名無勝弄土爲戲擁以爲城舍宅倉庫以土爲
麩著於倉中見佛相好德勝歡喜掬倉中土名爲麩
者奉上世尊金光明經復觀是身如水沫多諸

小謨觴館文續集注卷一

三十九

蟲尸不淨可惡我今捨離以求寂滅楞嚴經譬如
行客投寄旅亭或宿或食宿事畢俶裝前途不遑
安住五燈會元盤山寶積禪師上堂夫復是月孤圓
光吞萬象光非照境亦非存光境忘復是何物
五燈會元二祖慧可大師或入酒肆屠門或習街
談隨厮役曰我自調心又延宗禪師人問和尚住此
山得幾年師曰鈍鳥棲蘆困魚止樂又西域崛多三
藏見僧靜坐曰觀靜師曰觀者何人靜於理何物六
祖壇經生心觀靜是病非禪長坐拘身於理何益
五燈會元盛勤禪師上堂多生覺悟非干衲一點分
明不在燈又張拙秀才呈石霜偈曰剛除煩惱重增
病趣向眞如亦是邪裴度自題畫象一點靈臺丹
狀青莫

登華圖記

登華圖者前湖北觀察陳永齋先生官修撰時典試關
中作也領褻千佛拜榮七騎乘輪遊髦張爐入陝門棘

旣撤鉤梯乃遊茲山屹削嶢嶠懷靈抱異一掌承露三
花滴漿雲生玉女之窗霧暎公超之市暮收少昊肅彼
羣真太乙終南列其孫幹先生風領嶽峙峻儀巖標塵
中傑魁天際遐想雲袂仙舉星垣手攀陵峻谷蹴岷峨
俯雍梁睨河渭聳節延爽吐欲顯秋齋心驂煙呼吸帝
座由其遁骨契符神區故得鳳翥搏鸞停鵠跼盱衡
談蕩軒豁端倪通元氣於混茫軼埃壻之混濁絕倫超
羣厥觀偉矣今者身歸兜率貌留丹青詰嗣兆賢門基
克肩父書跪讀展象增慕徵文揚休齒蒼真形蔥翠在
目羽霓被飾翔飛若生兆賢式瞻鋒稜緬睇矩度其將
景行仰止拔俗振奇驚精九旻遊心萬仞爲驥致遠爲
鶴摩霄翼尙瓌辭霞開颺起宏矚高軌異神同恢廓
襟情冥協懷抱嗣芬之道孰大於是攬筆述勝庶幾勉
旃

小謨觴館文續集注卷一 四十

韓非子外儲說秦昭王令工施鉤梯而上華山以松
栢之心爲博箭長八尺棊長八寸而勒之曰昭王嘗
與天神博
于此矣

牙華堂記

牙華堂者明嘉靖時僉事金公對峰罷歸武林卜居別
墅也公以上第佩綬銓門時則龍虎返真欽鴉作相吐
喻霜露鼻息虹霓阿之者鼓鯁鱗嬰之者膏斧鑕一時

探榮轍微寵津脂韋突梯俯僂匍匐耀金帶白率皆掃
門之人接軫成陰固非拜塵之侶公獨峨然確爾膽勁
心方陸沈十年懷滅一刺蕭太傅自引出閣豈囁博陸
之尊顧凱之行腳繞牀得免景仁之黨能以一糞力障
江河旣而冰山自摧繡斧出按荻苗瓜蔓遏彼騰湍棗
野瓠歌偉其底績屬當右貂煽焰蒼頭帖權有馮子都
之倚依爲舍中兒之犯法公乃立與杖決懲以荆條駐
車叩馬董宣縛湖陽之奴獲書加笱虞延收陰氏之容
挫伏獯獯比擬鷓鷹卒忤恭顯之威俾追疏董之轍於
是解纓捨冕飲谷餐霞戢鷓鴣之風作蜘蛛之隱蘇門

小謨觴館文續集注卷一 四十一

鸞音之嘯高抗羽霓洛下雞栖之車長懸蘿薛爰卜別
墅啟拓疏寮顏以牙華侍郎茅瓚筆也雲戶岫寢邈輝
含籟月高窺桐石冷當牖巖芳樾館煙蒙蔦松之廬風
飄蓮衣香溢逍遙之谷威鳳息羽翔鴻脫笈蟄伏華藏
高騫竦跡是非振俗塵外卷舒無方者歟年往勁矢基
湮汗萊庭堅之祀旣乏雲祊柳季之隴遂侵樵牧族孫
中書君應麟愴念舊德思慰幽泉馬鬣手培犀瓣弗露
岳精台耀重立揚震之碑後道前岡共式比干之域昔
卞彬修忠貞之墓乃出齊廷范雲求竟陵之刊僅由故
吏方之前軌今益足多猶以讓水廉泉柏年宅廢涼臺

燠館午橋莊荒規復舊模先徵文記夫赴曲蹈節弦絕
而音流尋煙染芬薰息而芳在彼元載芸暉林甫偃月
流傳簡牘徒穢齒可今者鈐山書廬萬流唾斥闔寺大
第尺土餘腥而公鋒稜凜如精爽宛在游九京者流連
于隨會過雍涼者致拜於扶風則斯堂也不必斲椽龔
石連欂櫨榮卽以爲魯恭靈光之殿巋然長存少陵成
都之居突兀如見可已永年誌美敬書此詞

劉峻廣絕交論吐激與雲雨呼喻下霜露 李白古
風鼻息干虹霓行人皆怵惕 抱朴子刺驕篇其或
峨然守正確爾不移又品行篤瞻勁心方不畏強禦
漢書蕭望之傳是時大將軍霍光秉政長史丙吉
薦儒生王仲翁與望之等皆召見先是上官桀與蓋
主謀殺光光既誅桀等後出入自備吏民見者露索

小謨觴館文續集注卷一 四二

去刀兵兩吏挾持望之獨不肯聽自引出閣 南史
顧覲之傳殷劉隙著覲之不欲與殷景仁久接乃辭
脚疾免歸每夜常於牀上行脚及義康徙廣朝廷多
受禍覲之獨免 漢書何武王嘉師丹傅陽武嘉區
區以一簣障江河 後漢書虞延傳遷洛陽令是時
陰氏容馬成爲姦盜延收攷之陰氏屢請獲一書輒
加笞二百 宋書傅亮傳初奉迎大駕道路賦詩有
悔懼之詞曰 四牡倦長路君轡可以收張邴結晨軌
疏董頓夕輶 後漢書陳蕃傳朱震字伯厚奏車軌
太守單匡臧罪並連匡兄中常侍超三府厚奏車如
雞棲馬如狗疾惡如風朱伯厚 盧鴻嵩山十志詩
紫巖隈兮青谿側雲松烟萋兮千古色 霍薩蒙龍兮
開樾館臥風霄兮坐楮旦 周書韋夔傳明帝爲詩
詒之曰香動秋蘭佩風飄蓮葉衣號之曰逍遙公按
逍遙谷唐潘師正所居見唐書本傳此蓋借作韋夔
事 庭堅不祀見左文五年傳 戰國策顏觸曰昔
者秦攻齊合有敢去柳下季壘五十步而樵採者死
不赦 謝惠連祭古冢文蔗傳餘節瓜表遺犀 洪
适隸釋太尉楊震碑乃台吐燿乃鬱降精 薛尚功
鐘鼎款識比干銅盤銘左林右泉前岡後道萬世之

靈于焉是寶任昉爲卞彬謝修下忠貞慕歆李善
注蕭子顯齊書曰卞彬字士蔚官累至綏建太守卒
又任昉爲范始興求立太宰碑表注齊書曰故吏范
雲上表爲子良立碑南史胡諧之傳范柏年見宋
明帝曰梁州惟有文川武鄉廉泉讓水臣所居廉讓
之閒蘇鶚杜陽雜編元載造芸暉堂用芸暉草塗
壁唐書李林甫傳林甫有堂如偃月號月堂每排
構大臣卽居之思所以中傷者傅亮爲宋公修張
良廟教過大梁者或佯想於夷門游九京者亦流連
於隨會任昉爲范始興求立太宰碑表李善注臧
榮緒晉書曰扶風王駿都督雍涼州諸軍事後魏語
吏樹碑長老見碑者無不拜之其遺愛如此國語
趙文子爲室斲其椽而斲之列子力命篇居則連
櫛注櫛屋棟也管子山國軌宮中四榮樹其餘曰
功害女

三十六陂春水圖記

小謨觴館文續集注卷一 四十三

高郵五湖巨浸也珠川平阿樊梁臂社若洮澗之滙勢
等湘漢之合流灝漾潢漾蕩蕩雲沃日蘋末鼓怒盤渦激
湍稽天騰山百里無際峩編掀葉篙師悸魂蘆渚菰洲
險類溟渤前明嘉靖間仁和金公樓泉攝刺是州求民
之瘼治蘄爲夷開石梁導石曰濬秦蘭障洪澤分支以
殺悍增防以遏衝別疏平川用避賊浪馮蟻陽侯斂其
威聳輕舸疊舸恣其泝沿旅嬉于津農扞于野公底其
績客寫其勝此三十六陂春水圖所由作也夫其鏡瀾
澄空洪漲若砥淀瀆懸邈葑蒲蔓延蛟鼉不驚鳧鳥咸
若或曳而穀練或滌而玳環斜陽楮汀漁唱四起素月
娟瀨懼謳時聞無風波之憂有濠濮之想蓋公之擿隱

察伏蘇枯弱彊敷歷吳秦卓冠司牧澤物之政斯其肇
端美哉厥功爲德遠矣九世孫中書君應麟旣條治行
臚于家乘復以此圖徵記于余緬惟李冰離堆郾晨鴻
卻鮑昱石洳鄭國涇渠疏盈瀉溢澹菑捍患鴻勛上善
實足嗣風灼當世芳千古圖其左券也予固勞人數道
淮海登覆孟之城睇汜光之浦郅隸猶在荷塘日歇市
喧雜于鼙聲墟里降于葦岸沈臆之疾比戶蕩析之慮
終年中書君毋亦念魚鄉憫雁澤欲俾居者無沈窳涉
者無摧檣利賴之謀師帥是仰用是寶遺繪述祖芬其
將傳玩守土紹休前烈有舉毋廢因水茂功視夫志表
聖之書屏珍衛公之故物其意量固侔乎遠哉彼弋陽
之陂沈菜之堰滬瀆之壘尚書之塘前規具存後賢不
乏景迹生慕觀感當何如也

小謨觴館文續集注卷一

四十四

案司空圖有書屏記韋端符有衛公故物記魏志賈逵傳又斷山溜長溪水造小弋陽陂又通運渠二百餘里所謂賈侯渠者也晉書傳祇傳爲滎陽太守造沈滎堰至今充豫無水患晉書虞潭傳修滬瀆壘以防海沙百姓賴之唐書地理志泉州清源郡縣晉江東有尚書塘溉田三百餘頃貞元中刺史趙昌置名常稔塘後昌爲尚書民思之更名

懷知圖記

蔣子伯生提桴執場策功詩閣以文字業現宰官身測
交約歡雅游接軫羊欣入座謝混易衣王粲在門蔡雍

倒屣乃至芷蘭合臭則契結攬環淑美通詞則情均解
佩往夢悅魄停雲貯襟分寫爲圖徵言以記夫急弦勁
矢密運者歲年吹塵起漚偶然者交際伊古真人作達
等道義于蘧廬釋子捐機置冤親于平等假使繫心沫
聚生愛旃塗得無綴網之纏難比黏糍之解然而境由
幻構幻卽是真情從想生想歸于正是以廣桑山土風
有淵源兜率天中非無眷屬旣金石之誼重卽香火之
緣深豈可付之冥忘視同泡電乎茲境茲圖固實相之
端倪枯禪之藥石也以僕輪材去君十舍而南皮舊侶
東閣勝流飛蓋西園停車北里歡屢墜而莫續羽方翕
而復分筭脫波頽星離兩絕惟欲披莊盈尺繡佛一龕
託諸陽焰空華藉釋迴腸紆軫煙雲棲目豪素觸懷宿
習再薰識浪復鼓落落四海負負寸心讀畫申辭但有

嘅息

李商隱爲李貽孫上李相公德裕啟提梓于絕裁之
場班揚掃地鞠旅于無前之敵江鮑輿戶司空圖
力疾山下吳村看杏花詩懷家自有麒麟閣第一功
名只賞詩宋書羊欣傳嘗詣領軍將軍謝混混拂
席改服然後見之族子靈運告族兄瞻曰望蔡見羊
欣遂易衣改席欣由此益知名魏志王粲傳蔡邕
見而奇之時邕才學顯著貴重朝廷聞衆在門倒屣
迎之五楹會元慧安禪師曰此心仁義先王之蘧
廬也止可一宿而不可以久處莊嚴經論尸利龜
多因設火坑并毒食害佛不得悔過號泣世尊告言
汝勿憂怖卽設偈言起我我無瞋久捨冤親心右以

旃檀塗左以利刀割於
此二人中其心等無異

小謨觴館文續集注卷一

四十六

小謨觴館文續集注卷一終

小謨觴館文續集注卷第二

錢塘孫元培長熙纂輯

李忠毅公誄

夫佻身飛鏃臨敵引義之謂忠受寄建旌以死勤事之謂毅是以膏塗氏斧悲殉令於孝侯篋屨元纒痛歸喪於國子若乃風船火艦方收橫海之功鱗渚鮒潯遽邁埋魂之變三翼競進一鼓前衰舂腥棄而滄溟翻河魁搖而大星落其有不哀逾田冢泣甚羊碑者乎今浙江提督西巖李公諱長庚字超人同安人也世守惇學長習奇肱辰精嶽秀之祥含精於天漢皎日大河之志勵

小謨觴館文續集注卷二 一

銳於風雲始登翹關之科繼入期門之籍句陳太乙肅象緯於周廬甘泉長楊奉清塵於罕畢乾隆四十一年出爲衢州都司迄

今上初元累功至水師提督時則胡藍朱蓋鉏剪無遺綿蔓瘿楊奸隱不作惟茲鯤海越在偏隅地當甌駱之交覺有孫盧之孽鯨鯢揚鬣以吐霧鞞綸磨牙而食人朦朧聯窮髮之墟烽火照扶桑之岸公秉桴厲士受鉞行軍王濬本水中之龍高昂亦地上之虎星流霆擊嫫媧姚玉弋之弓電逝雲飛楊素黃龍之艦蹴之象嶼困之漁山窘之北汕覆之東涌身歷百戰俘馘數千公孫述

之帛蘭層樓灰滅侯子鑿之鵠舫百棹煙蘿葢軸襜臚
賀齊橫江之鬪水車拍舫世譜赤亭之捷撥矚刺蜚厥
功偉焉其閒邁迕盤錯經歷升沈幾垂回谿之翅再奮
龜池之翼鬪令尹之紆難不恤毀家祖建成之著鞭自
能募士用得遴國爪被水犀莫鯤身掃鮫室斬獲過當
飛走將窮

天子嘉伏波下瀨之勞有珠劍龍環之賜策以後績於
厥殊勳公乃益勵鷹揚誓平豕突胡僧祐門開朱白不
捷無歸劉季奴手折麾竿追奔弗顧以嘉慶十二年之
冬躡賊蔡牽於黑水洋蛾徒悉殲鹿鋌無路公環甲親
戰欲登其舟猝犯礮機薨於行陣嗚呼哀哉軍歌虞殯
空歸襄老之尸身伏弓衣竟中呂錡之頂蒼頭犀角奉
哈襪而遄還利觜鋸牙決置學而遽去事聞

小謨觴館文續集注卷二 二

天子震悼追封壯烈伯諡忠毅廕其子入官頒東園之
祕器卹羽林之孤兒慟輟綠沈之瓜悲題黃腸之湊禮
也公拳猛沈毅武節剛方龍泉太阿是爲知己饒笏競
病亦解敦詩當其運智九天取決百勝何難禽渠瀛島
懸首藁街而時命不猶雄圖沮屈上感推轂醮廟之寄
下厓鼎沸魚爛之災進懷中山篋書之憂退有北平對
簿之慮李都尉獨當冒頓將輒後期王君廓被遏茂功

憤常流血於是決命爭首絕慮無遷生死舟航寢食潮
汐慕容西津之艇列仗而前康生中渚之刀依煙直進
始圖埽籜之功終蹈裹尸之義宜乎寒風大樹哀騰七
萃之軍薤唱蒿歌淚灑八閩之水矣禮曰賤不誅貴幼
不誅長昔安仁之於馬敦延年之於陽瓚位託舊史於
誄爲宜下士疏逖非僭則妄顧拜祁連之冢同傷驃騎
之亡聞隴上之吟各有陳安之弔非禮之禮不能無辭
爰作誄曰

國輔明義將軍死綏桓桓獲獲今古同歸逝者長已魂
兮可追百身莫贖含識知悲於鑠昌期塵清宇謐南嶽

小謨觴館文續集注卷二 三

東鞞堯雲舜日戶革鴟音家無鶴膝韜干閣戈鋒投警
歇蠢爾南邦重溟環外昇紛伏鱗東縈西帶湍峻渦盤
竄息駝喙化爲豺狼甘人作膾來或颺迅去則烏飛鉤
戟長鍛拋石弧錐越舶琛賣日南象犀恣其橫噬喻彼
封豨矯矯虎臣繫公是恃戎幕初張孤忠自矢誰呼癸
庚以家財理誰病瘡痍以噢咻起孰云溟滓直戶庭視
孰云能罷乃腹心使勇各尋約爭無掬指屹然和門天
南岳峙當時醜旅類非一族或號艇徒交州夷屬或爲
劇盜澳嶼潛伏妖等白波兇逾青幘波跳舵牙風飽颿
腹不畏天吳靈愁楊僕惟公奮節凜然枕戈率彼組練

鞭爾鼉鼉納刀於韉沈璧於河聞鼓而已違知其佗海
童馬銜鐵額銅頭如駟失羈如鷹脫鞬顏息志目叔孫
椿喉望影怵惕聞聲遠投艇駛旣戡盜氛猶熾大壑鴟
張洪瀾蟻萃更策橫衝躬揮精銳鷁首山臨蝦鬚雨墜
要遮滄波搜牢澤數虎落天羅宜左宜右鵠入鴉羣豆
當牛口假息游魂輒跳而走大鵬火鑑懋賞遐頒穹碑
烝鼎豐功待刊露橈直進倚角靡援勇氣虓闕嘆咄煩
寃歲居單闕日在葵女芒息櫂槍技窮爪距犁穴繫頸
功成炊黍旻天不圖縱其旅拒長風巨浪駭石飛蟲鐵
幕無障犀渠莫防中臣要害歸靈大荒全軍勢面呼暑
雷碾嗚呼哀哉高牙大纛疇非折衝公獨身先被羽摧
鋒詎希旂常詎慕侯封夙夜匪解本於靖恭非無幕府
簿書詰責非無章疏鉤攷倚撫恩全

小謨觴館文續集注卷二 四

九重望冠羣策鋒鏑雖罹穹蒼可格嗚呼哀哉典隆飾
終榮錫珪符縣潘授邑涿聚存孤丹荔黃蕉青旒赤車
生榮死哀公毋鬱紆峨峨巒嶠滔滔澗濤英爽愜閔
屍載遨倘駐雲車動其弓刀定殪羣醜紛如蝟毛漳江
之濱侯賓之里崇祠綽擗奔走禋祀末學卑凡聞風仰
止累德攄詞百世以竣

顏延之陽給事誅而瓚誓命沈城佻身飛鏃 潘岳
關中詩周殉師令身膏氏斧李善注周處別傳 氏賊

齊萬年為亂處仰天歎曰古者將受命鑿凶門以出
蓋有進無退我為大臣以身殉國不亦可乎遂戰死
案晉書處謚孝 儀墓元纁見左哀十一年傳 庾
信周大將軍吳明徹墓銘風船火艦周瑜有赤壁之
兵蓋舳艫艦賀齊有橫江之戰 齊書張融傳海賦
涼空澄遠增漢無陰照天容於鯢渚鏡河色於鈔潯
張協七命爾乃浮三翼戲中泚李善注越絕書伍
子胥水戰兵法內經曰大翼一艘長十丈中翼一艘
長九丈六尺小翼一艘長九丈 唐書選舉帝置武
舉有馬槍翹關負重身材之選 後漢書耿純傳時貞定王劉
陽胡藍朱蓋等復反 後漢書耿純傳時貞定王劉
揚復作讖記云赤九之後瘦楊為主揚病瘦欲以惑
眾與綿蔓賊交通 王維出塞詩玉靶角弓珠勒馬
漢家將賜霍票姚 隋書楊素傳居永安造大艦名
曰五牙次曰黃龍 後漢書公孫述傳積糧漢中築
宮南鄭又造十層赤樓帛蘭船 梁書王僧辯傳王
師次于南洲賊帥侯子鑒等率步騎萬餘人於岸挑
戰又以鵝舩千艘並載土兩邊悉八十棹去來趣襲
捷過風電 陳書徐世譜傳善水戰從陸法和討侯
景與景戰于赤亭湖別造樓船拍艦火舩水車以益

小謨觴館文續集注卷二 五

軍勢 荀子富國篇午其軍取其將若撥豔 戰國
策必令其言若循環用兵如刺蜚注刺蜚言易也
鬪令尹見左莊三十年傳 晉書祖逖傳帝乃以逖
為奮威將軍豫州刺史給千人廩布三千匹不給鎧
仗使自招募 墨子七患篇食者國之寶也邦者國
之爪也 南史羊侃傳以力聞魏帝嘗謂曰郎官謂
卿為虎試作虎狀侃因伏以手扶殿沒指魏帝壯有
賜以珠劍 南史章叡傳賜以龍環御刀曰諸將有
不用命者斬之 梁書胡僧祐傳侯景寇荆陳僧祐
起援將發謂其子曰汝可開兩門一門擬朱一門擬
白吉則由朱門凶則由白門吾不捷不歸也 宋書
武帝紀將戰公所執麾竿折折幡沈水賊必懼公笑
曰往年覆舟之戰幡竿亦折今者復然賊必破矣即
攻柵而進 虞殯見左哀十一年傳 襄老見左宣
十一年傳 呂綺中項伏殺見左成十六年傳 漢
書霍光傳東園温明皆如乘輿制度服虔注東園處
此器形如方漆桶開一面漆畫之以鏡置其中以懸
屍上大斂并蓋之 漢書百官公卿表又取兒軍死
事之子孫養羽林官教以五兵號曰羽林孤兒軍
史任昉傳武帝問問方食西苑綠沈瓜投之於盤悲

不自勝 黃腸見卷二注已注者例不再出餘同

顏延之陽給事誅拳猛沈毅溫敏肅良 後漢書祭

形傳論武節剛方動用安重 齊書高帝紀前湘州

刺史王蘊少有膽力每藏刀曰龍淵太善攻者于

孫子軍形篇善守者藏于九地之下善攻者動中

九天之上 史記甘茂傳魏文侯合樂羊將而攻中

山三年拔之返而論功文侯示之謗書一篋樂羊再

拜稽首曰此非臣之功也主君之力也 漢書李廣

傳大將軍長史急責廣至幕府上簿廣曰諸校尉無

罪乃我自失道今自上簿至幕府 唐書王君廓傳

君廓往擊建德李勤過之至發憤大呼鼻耳皆流血

李孫雄曰彼近其國有遷我絕慮無遷 晉書慕容

王孫雄曰彼近其國有遷我絕慮無遷 晉書慕容

垂載記伐翟釗次於黎陽津諸將惡釗兵精咸諫不

宜濟河垂笑曰豎子何能為我今為卿等殺之遂徙

營就西津為牛皮船百餘艘載疑兵列於沂流而上

魏書奚康生傳從駕征鍾離駕旋濟淮蕭鸞遣將

邀斷津路高祖敕曰能破中渚賊者以為直閣將軍

康生遂應募縛筏積柴因風放火燒其船艦依烟直

進飛刀亂砍投河溺死者甚眾 漢書霍去病傳為

小謨觴館文續集注卷二 六

冢象祁連山 楊子法言孝至篇螭虎桓桓鷹隼

鸞 焦氏易林家給人足頌聲並作干戈輶閣 齊

書張融傳海賦伏鱗瀆綵昇舫洗文 郭璞江賦長

波浹滌峻湍崔嵬盤渦谷轉凌濤山積 宋玉招魂

此皆甘人歸來歸來恐自遺災些 尋約見左哀十

一年傳 拘指見左宣十一年傳 舊唐書李光弼

傳將戰謂左右曰戰危事光弼位為三公不可死于

賊手納短刀于靴中示決死之意 沈玉見左襄十

八年傳 顏息見左定八年傳 椿喉見左文十一

年傳 隋書禮儀志每一整韃中施弩牀牀枕陛楯

鋼錐皆長五寸謂之蝦鬚皆施機關 六韜設營壘

則有天羅虎落行馬蒺藜 舊唐書竇建德傳先是

有童謠曰豆入牛口勢不得久建德行至牛口渚果

敗 後漢書岑彭傳裝直進樓船冒突露撓數千艘

注並船名 後漢書來欽傳見左臣夜人定後

為何人所賊傷中臣要害 涿聚見左哀二十七年

四川布政使姚公詠

維嘉慶十有四年十一月日故四川布政使姚公卒於
官越明年其孤椿樾奉匱歸葬肅徵鴻文昭紀前烈而
以銘誄見屬於予與其孤斷金之交不殊於天顯累
德之義敢謝於述尊公諱令儀字一如婁縣人也葉陽
息民代隆陰德伯審游學早負光名稟岳瀆之靈暉蘊
風雲之璋智應機立斷干將荆鐘綜覈清裁判刃刈腐
開達理幹基於少時逮登拔解之科首任典城之職滇
越夷徼巴濮蠻陬攬轡升車忠饗傑立屬當氏羌不靖
方召過征西渡瀘河羅些之城百尺北控青海魚服之
旅三千公采芑從戎蜚芻饋士冰立若阜鐵星之火不

小謨觴館文續集注卷二 七

難鳥高於人明駝之目頻啄膺蕭何轉粟之奇矢王尊
叱馭之心儲待無愆飽騰相慶遂得多羅函表槃木來
庭幕府上功游領華郡井絡天彭之野靈關玉壘之區
魚文驥子填撫其豪強鐵冶鹽泉劑調其緡算苗民鴟
義尙父鷹揚復奉簡書參其軍事惡溪水毒鳶翼墮而
猶前墨雲瘴來盾鼻磨而弗顧疾癘纏骨筆翰如流喋
血自甘銜膽益厲時則柱天都部成過龍驤騶卒廬兒
恣成虎闕公繩以令甲折其姦猖金布旣申銀刀乃肅
董宣直道縛湖陽之蒼頭翁歸公廉戢霍家之奴客以
今況古何多讓焉媿徒旣弭米賊旋煽韓千秋軍鋒之

冠馮奉世爪牙之臣咸謂樽俎折衝非公莫可發蹤指
示輒用諏詢公聚米之智規賊於掌中涌泉之謀決勝
於桀下周旋侃嶠之際申陳廉藺之道殺敵爲果師克
在和渾濬無爭韓白効績有嘉折首用議枚功三錫酬
其殊勛十連重其方任威行露冕超總藩條天性彊力
精於吏職不煩鉤距之施而庭無稽牒非假單複之術
而獄鮮道情楊震卻賂暮夜無欺許伯訟田輟耕相讓
修渠宏鄭白之利蠶粟踵罕樂之仁請雨捷乎廣微備
火儕乎叔度萬端千緒心祿手規閑泰無時精神坐竭
丹青騁轡高春之景已斜赤霞吐誠傳薪之焰遽盡上
雍州致仕之表進濮陽留務之章

小謨觴館文續集注卷二 八

天子眷賴方殷退征未許暫俾休沐冀起沈綿公感深
知力疾自奮高柔臥寢猶抱平文書子囊遺言不忘乎
社稷終以積勩奄見薨落烏虜哀哉公文武備具表裏
融通始自長相至於牧伯虛懷趨士折節獎賢苟且不
入施予靡倦凡諸懿行史得詳書顧勒勳之制事歸於
鼎鐘序悲之詞痛深於梁木含筆隕涕敬作詠曰

詩稱靡監易著匪躬開物成務移孝爲忠勸相無怠篤
渠有恭鏘洋遺烈施熾餘風命世興材昌辰誕德識宇
凝嚴靈襟峻嶷百里濯纓九遷搏翼膏雨歌郇涉川資

龍岷峨西陲篤筭南土贊普心生形天千舞盤瓠矯虔
瘦楊跋扈駱驛旌旄頻煩錡釜公以儒吏歷佐戎旃風
車火徼箐雨茅煙電掃書檄霆馳表箋猷敷上略機握
中權公之幹局入麤入細公之謀謩九天九地霸上棘
門股肱是寄賓叟青羌簞醪是庇幃瘡忘勞曉瘡靡計
參背消攙夔巫廓翳師奏愷樂伯偃靈臺褒帷幄業
讚雲雷人命作牧六條察材優賢揚歷麟黻昭回斐光
殊勳載熙庶績下厲含瓦陶勤運璧填厯簿領星流矢
激戢吞滯訟豪剖芒析惟公法學律稟皋蘇不漏吞舟
不察淵魚道在平反非止煦濡

小謨鵬館文續集注卷二 九

天語煌煌公遵弗渝惟公之名早徹

帝聽出車南仲班師去病敷宣允推聲聞隆盛欽矚有
基嘉除丕定公之疋羸衣不勝幹籌紆寸衷功強十萬
心忒形姑廢寢忘飯義感忠驅赴湯握炭神殫夙夜疚
中膏盲柳莊疾亟燭武精亡藥裹在手判書在牀弗躬
不信遑敢不農臣質凋華臣心集木雖疲百骸猶炯雙
目鳳落麟傷鐘鳴漏促昌國云殂列邦同哭烏虜哀哉
紆青拖紫接武聯鑣隨牒循資冠蟬珥貂公績獨異公
級斯超爵乃無忝功非倖邀仕流多歧治理殊狀清靜
爲高風流相尙公獨精勤嚴懲瘵曠始自牽絲終於屬

續烏虜哀哉公階既崇公祿亦優矯廉弗飾任卹惟周
蘭薰令問雪白清修桑無八百橘乏千頭公有佳兒賤
子所畏昆莫鋒銛黃中德粹文聚王海書紬金匱不朽
可期淹晚非累先哲有言匪爵而貴公澤彌長公靈足
慰烏虜哀哉茸城機山體魄是憑蠶叢魚鳥精爽升騰
僑終蹇謝市罷春停社立樂公祠陪李冰播之穹壤祭
於大丞用砥臣節千秋感興烏虜哀哉

陳書姚察傳察字伯審父知名梁武代每得供賜皆
回給察兄弟為遊學之資察並用聚畜圖書 陳琳
荅東阿王賤君王體高世之才秉青萍干將之器拂
鐘無聲應機立斷 後漢書范滂傳書佐李零曰范
滂清裁猶以利刃齒腐朽 魏書楊津傳於城中作
地道置爐鑄鐵持以灌賊賊相語曰不畏利槩堅城

小謨觴館文續集注卷二十一

惟畏楊公鐵星 左思蜀都賦並乘驥子俱服魚文

奴容持刀兵入市鬪變吏不能禁及翁歸為市吏莫

敢犯者 史記南越王尉佗傳於是天子曰韓千秋

雖無成功亦軍鋒之冠封其子延年為成安侯 漢

書馮奉世傳居爪牙官前後十年為折衝宿將功名

次趙充國 晉書王濬傳濬自以功大為渾所抑每

進見不勝忿憤范通曰卿功美矣然恨所以居美者

未善也 卿旋施之曰口不言平吳之事願老之不伐

冀遂之雅對何以過之 蘭生曰屈廉頗老之無

愧乎 吳志周魴傳魴表曰臣知無古人 單復之術

加卒奉大略公矚狼狽 後漢書魯恭傳訟人許伯

等爭田恭為平理曲直皆退而自責輟耕相讓 樂

朋龜賜陳景瑄大尉鐵券文論清政而水鏡無光吐

赤誠而朝霞失色 李商隱代僕射濮陽公遺表寒

暑頓侵精神坐竭竈之行營薪之火餘燥幾何隙無表
影之駒殘光即盡其行營三軍已舉燥差某官某河
陽留務差某官某 魏志高柔傳注柔既處法平允
又夙夜匪懈至擁膝抱文書而寢 子囊見左襄十
四年傳 左思魏都賦優賢著於揚歷劉淵林注尚

書盤庚曰優賢
揚歷歷試也

陸母林太孺人誄

維嘉慶十有四年月日吾友常州陸君繼輅生母太孺人以疾終於里第寒泉堙流黝室改聖尺書來赴幾不勝喪烏虀哀哉夫茝蘭之質以經燔而倍芳蒿菘之悲以述惠而彌摯不有紀謨曷彰修名太孺人姓林氏諱桂閩縣人也系出盛門幼丁孤露族有姑寡依以同居刈薪野中擊絮江上從夜績於同巷分餘明於鄰壁雖絡秀之賢族列於方雅而湛氏之貫史佚其淵源年十五歸於先丈補山先生是時方以翰林改官閩越迭尹

小篆觴館文續集注卷二 十一

赤邑表德百搢會配莊夫人卒蒙楚興嗟泉邱乃聘太孺人簪蒿而至服綦以前上承威姑下教家督歷襄凶嘉之儀獨綜陵襍之務內外斬斬執禮無違迨補山先生罷官里居獎接羣彥兆菴所曾諧際者有若洪太史稚存孫觀察淵如趙司馬味辛餘尙多魁壘方聞之士咸以所業來質太孺人手潔供具精羶酒漿樂飲極歡率過所望無何先生奄捐館舍茹荼厄事儲淚撫孤論者謂先生曾記名知府欲以四品服歛或以長君方擢知州可從五品太孺人以爲僭定從七品諡宜爲惠足光柳下之賢袞不容斜善承黔婁之志達識守禮同符

古人矣當繼輅之始入塾也受孝經論語太孺人曰若知熟此何爲耶將使若爲人如書所云也稍長輒舉先丈所治疑獄命繼輅以意斷之不如法乃以所判告周官之業預受於宣文陳力之風稔聞於班媛詩曰君子有穀貽厥孫子又曰彼姝者子何以告之斯之謂已時則廉吏之後室無贏金通德之門巷多車轍珩璜瑀瑯之儀捆紵均軸之訓或劉薦以給客或闔門而傳言閨範具瞻哲嗣騰茂繼輅始列學校洎登賢書光譽孚於勝流文采耀於門業羣公庶士壺拂相招太孺人念其負米之誠教以測交之道斯言之玷凜戒於白圭責人

小謨觴館文續集注卷二 十二

無難尙詢於黃髮屬年開七十海內賢士大夫舉以文辭爲壽常熟女士歸懋儀詩云列鼎而食不如一簞非母矯情慮有盜泉太孺人獨心熹之卽其志行可知矣平居以厚處眾以儉奉身樵蘇常乏必謹筐篚之來璣珉不存用周戚鄰之急年七十有五遘疾遽終嗚呼哀哉當其彌留神觀激澈謂繼輅曰吾來汝家六十年於茲汝父廉乎後當食報吾聞爲善非以求福然爲善求福不猶愈於爲惡邪施子不當望報然施子望報不猶愈於鄙吝邪汝曹識之庶免浮薄之行乎清芬垂訓足補鑿楹之書名言不刊長流燿管之烈兆蓀與繼輅交

忝撫塵誼敦拜母誅長之僭所不敢辭乃作誄曰

聖哲演教篇曰女師旣昭婦則兼擅母儀穹窿高門婉
婉淑姬肅肅宵征實主中閨無諸之郡典城之長懸魚
同貧酌泉分爽一官升沈萬里莽蒼持身持家以字以
養曰有大事春秋窀穸曰有大禮儷皮束帛送往事居
心祗手畫洪纖畢宜上下咸懌懋英髦踰踰閭左聯
穢綺裳合尊促坐整飭中廚肆陳瓜果咄嗟心勞精辦
力瘳猗彼賢妣嘉允篤生出就外傳辨志離經歸投母
懷呻嘍誦聲春晝五餐宵分一燈謂兒讀書不在章句
謂兒立身先端志趣戒兒毋佻作色以怖誘兒克勤溫
顏以煦異時學成有體有用孝秀旣升天門待犴所慮
才高或不諧眾汎愛親仁危詞悚動食貧待養不免服
勞豈況縞紵有諸賢豪母獨兢兢訓之持操凜潔而飢
毋羶而饜動規往古篋有陳編衣必三澣梳無新懸四
壁風蕭凝神湛然繁霜降節貞粦益堅婦稚嬰媿執箠
執翻羣從喧厖或吳或敖片言成箴微詞釋躁一笑寥
寥家人走告境約心廣拯阨凋難任恤之義同危共安
雖不以聞我力必殫或有不逮爲之減餐坤爲吝嗇母
乃慨慷兌爲和悅母乃矜莊勁心後凋美延降康白髮
盈顛斑衣滿堂世有姬姜委佗象服世有妯媪麋壽通

豕浮榮可同性分所獨何怪歸魂萬淚棲目嗚呼哀哉
體魄雖逝高風不積流川惠問聳漢音徽棘心損疚風
樹紆悲庶葆初訓靈兮儻來

宋嚴氏粲詩輯葛生蒙楚此悼亡詩

韓愈曹成王

碑持官持身內外斬斬 劉向列女傳柳下既死門

人將誄之妻曰將誄夫子之德邪則二三子不如妾

知之也乃誄曰夫子之諡宜爲惠今門人莫能竄一

字 列女傳黔婁先生死覆以布被手足不盡斂曾

子曰斜引其被則斂矣妻曰斜而有餘不如正而不

足也 列女傳文伯相魯敬姜謂之曰吾語汝治國

之要盡在經矣出入不絕者捆也捆可以爲大行人

推而往引而來者綜也綜可以爲開內之師主多少

之數者均也均可以爲內史服重在行遠道正直而

固者軸也軸可以爲相仲尼曰詩曰君子有穀貽厥

孫子此之謂也 世說盧郡范遠投侃宿僕馬甚多

侃母湛氏劉諸薦以爲馬草 劉向列女傳康子嘗

至敬姜闔門而與之言皆不踰闕 列女傳君子謂

孟母善以漸化詩云彼姝者子何以予之此之謂也

小謨鵠館文續集注卷二 十四

文學姚君妻何氏詠

年月日吾友婁縣姚君建木厝其妻何孺人於紀家鏹
祖塋之丙舍以其兄春木所撰權厝銘示予而請爲之
詠予於君兄弟石交素聯坤惠允悉內壙之文所不獲
辭孺人姓何氏上虞人也誕澄粹之華宗稟滄懿之朗
節齟亂慧照動與禮遊弱笄温恭靜以義立旁涉書傳
雅好春秋賁道之稱待年已著父通判君與今方伯姚
丈同官蜀中旣聯組纓遂締禽幣文伯卜室賦綠衣之
三章臨城納嫺審外宗之七德妙簡貞閑足爲佳對焉

當建木之迎婚於楚也時通判君移攝鄆縣以事被彈
秣馬之禮初修宜犴之歌忽作孺人遽辭阿傳遠奉清
塵父羈屑於三湘母分張于於越迢迢閭闔屈壯志於
緹縈簞簞竹竿軫悲腸於衛女含辛御輪之夕制淚施
衿之辰蓋窈窕之情既傷沈頓之疴由作矣逮乎執筭
奠席鳴環侍寢柔聲怡色上悅乎眉黎黎明識惠心下孚
乎臧獲助德理內允協福原而元穹靡忱美疚加劇營
陵之術莫蘇入銷之魂聚窟之香難迴積損之幹卒年
十九嗚呼哀哉建木雨絕之痛既深薜英之思無已追
懷馨烈緬溯徽華鳴雞問疾之恩相鼠諫夫之義言猶
在耳感不去心徵文杼哀銘旂表德來芳可述誄之云

爾

性芬揚蘭德穎振玉吁嗟之子行劬年促越溪稚質宋
子河魴婉情同春明景皎霜阿錫妝嚴絃縱藝綜馮嬀
史書惠班賦頌教成而祭宗室羞蘋女子有行難辭遠
親吉儀方肇家艱云邁宿沛神摧陟阿心疚褫帶就測
南瞻楚邦錢唐曹娥東望兩江叢花障扇襍佩含風組
舞驂駢竒窳房欏桃李盛年苞栩至性涕擊沾衣蛾脩
鑠鏡嗟晚質之易凋兮况煩寃之鬱抱觸炎風而涉川
兮蘊悲情而見廟相夫猶勤慰姑仍笑免薨飭厨綸繩

佐鈞之子體瘴問之輒諱君子違疾忘身以衛景旒
其欲匿兮帷淒淒而動風羌殄殒而將逝兮猶髮鬢之
修容乎瑜華收衣篝香炮信百憂之傷人兮何華齡之
可假嗚呼哀哉高堂旃標兮婢媪拊膺潛隧既敞兮掩
彩重扃繫淑慎之善懷兮家孰內而孰外或言告而言
歸兮固殊分而同愛彼思親而危身兮豈孝思之能匱
嗟蒼昊之寂寥兮何與善之茫昧嗚呼哀哉玉寒泉薶
隴幽光映柔顏殞目規詞留聽華落英存馨流問令眇
四節其代序兮託神衿於遺詠

國語公父文伯之母欲室文伯饗其宗老而為賦緣
衣之三章 梁書徐摛傳臨城公納夫人王氏即太

小謨觴館文續集注卷二 十六

宗姑之姪女晉宋以來初婚三日婦見舅姑眾賓皆
列觀太宗問摛摛云婦是外宗未審嫻令所以停坐
三朝觀其七德 北史高允傳古之婚者皆采德義
之門妙簡貞閑 晉書簡文宣鄭太后傳帝謂劉隗
曰鄭氏二妹卿可為求佳對 史記漢文帝紀齊太
倉令涓于公有罪當刑其少女緹縈隨其父至長安
上書願沒入為官婢贖父刑罪天子憐悲其意下詔
除肉刑 白虎通諫諍篇詩云相鼠有體人而無禮
此妻諫
夫之詩

節孝張孺人誄

孺人姓張氏居吾州之西城曾祖來吉武舉人官泗州
衛守備祖淵武進士候推守備父燾例貢生孺人年二
十五歸於州處土王君之經王君出為其世父後結褵
二年而亡孺人事嗣姑及本生翁姑以孝聞無子以從

子士麟爲後教養成立今嘉慶十有七年冬孺人以疾
終年七十有七計守節五十餘年明景朗操里黨欽歎
平居訓子以義持身以儉好讀書尤熟史事尙論忠孝
激越奮發如烈丈夫著有椒亭詩一卷士麟以狀來屬
銘於予以爲嬪則以待旌門誼不當卻爰作誄曰

風詩共姜春秋紀姬宣聖特筆日星昭垂二百卅載邈
邈等夷恆貞經訓高蹤允稀辰彼女師清河之媛嬪於
太原門高士彥職謹滌帛養勤視暮絞訐聲無愉柔色
善弋鳧贈佩侍櫛鳴絃馨質服萑令儀采蘩所恃奄殂
聖戶連艱志守陶嬰賢追義桓哪嗚在懷熒子留影兩

小謨鴈館文續集注卷二 十七

晦夜漫霜嚴日炯送往撫遺育生安冥祖奠遣車規畫
井井姜教庀業班訓遵衢女乃士行文而又儒紡軒篲
火授簡陳書機聲讀聲風淒一廬勤勞弗辭搢搨自力
謂當貧辛敢畜臧獲袿袿華鮮鍼紉綻裂中饋漿醜宵
閨刀尺田僅廿畝納程必勤書誦百卷邪詞必焚馬班
事貫屈宋香薰抵掌盱衡千秋正人嗚呼哀哉徽媿不
彰積齡難駐竹筠松心式瞻行路節惠杼詞煒彤永譽
綽楔標楣蘭芬並布

蔣竹雅妻陳氏誄

孺人姓陳氏諱芳雲元和人永齋觀察之季女也毓粹

洪族含芬幼歲生具端範斥華丹之塗性嫻雍和絕差
訐之事長歸同里蔣君春藹上怡尊章中協先後旁模
族鄙下孚僮服藥彼慶善風規穆宣賦質素脫諸自強
力二女甫孩益瘁鞠育年月日歸寧母氏感疾遽終年
二十有八奄扈之辰姑適疴作哽戀仰系不去於懷婦
貞恆德女有士行不以才著而言才者莫尚焉蔣君爲
余外舅時菴先生族子孺人同懷兄兆賢又嘗從學於
子書來請銘因不獲辭誅曰

攸遂易規無儀詩做人飾其容尠飾其性月望占厲休
鷺忽正斧之藻之克柔克令展如碩媛高閼祕儀浚源

小謨觴館文續集注卷二 十八

璇潔馨度蘭猗納順待年申防自持有蕢其實華德兼
斯衣被纁神禮交沃盥執棗西階升豚側胖施表承尊
熬膾謹爨同聲瑟調戒夜星爛慎爾出話金玉其音密
緞正直塞瘞淵深語屏枝忒功劬組紉外莊樸矚內映
明心矯弱而恭返參以約璣珥華蠲袿裳鮮卻稚介羣
諧娛媾允若翼翼矜矜式彼佻薄惇直怙篤宜基壽康
司化莫晰匪祥而殃瘡瘵癘瘳虺積元黃瓊田乏草西
域無香嗚呼哀哉堂北酸銜榮南悲觸斷手兄嗟扶牀
女哭侶坻鷓枝愁撐魚目襲札書徽川流遺韻

張華女史箴人咸知飾其容而莫知飾其性性之不
飾或愆禮正斧之藻之克念作聖 陶宗儀古刻叢

鈔宋張氏墓志遠葉蘭飛浚源瑤潔詩有蕡其實
毛傳蕡實貌非但有華色又有婦德又其心塞淵毛
傳塞瘞淵深也又綱直如髮鄭箋其性情密緻操行
正直如髮之本末無隆殺也惇直怙篤瘡瘵瘳瘳
俱見爾雅釋詁

汪孝婦哀詞

長洲孝婦吳氏嬪於汪居蕭家巷年二十卽隕所天貧
無宿糧息止弱女皤皤尊章癯老且病婦代子職躬服
其勞素嫻詩書開塾講授藉脯脰以給養供菽水而靡
缺鄉黨翕然推其高行嘉慶十二年十二月十八夜比
鄰不戒於火融風旣熾將燔及廬翁挈女孫先走出戶
婦旣翼翁以免姑抱宿疾猶寢於牀婦復入屋背負姑
出煙燄旣合鬱攸從之遂并其身殲焉質明火熄行火
所燼焦爛之中肢體宛若共見婦手抱姑不釋彼以義
忘其軀天以死成其烈萬眾感悼填衢溢郭邑中人士
將白當事邀褒錫之典廣徵詩歌道揚奇節圓廡方趾
疇能不悲敬述厓略而系以哀詞曰

小謨觴館文續集注卷二 十九

抗古今而衡節兮疇璧碎而瓦全有冒刃而慳免兮有
拯危而體捐揚烈芬於委灰兮發繁音於絕絃彼君親
赴難其一致兮初何計乎探湯而蹈淵翳婉婉之淑靈
兮傀形單而寤標瘁形神而頤翁姥兮旣餐荼之莫告
胡滌膾視膳之尙不獲遂其常兮又昊天之不弔儻諱

諱出出之告災兮賊天跳而地踔飛燦燼煜而紛屬兮
各走覓乎逃門幸一老之先身矣兮念威姑之待援奮
輕軀以排闥兮承龍鍾以背肩電光礮礮迅其四合兮
束身手而同燔茹煩冤於哀燼兮魂應叫乎九閭瞻庶
女之訴哀兮天猶爲之隕霜何匹婦之精誠兮不爲反
風於撞糖或炎官熱屬之實陰相兮俾身殉而名彰帝
閭陵統其不可叩兮淚流衿以浪浪昔上虞之救盱兮
投江濤而必果厲猛志以偕亡兮視頂踵猶塵堞一父
而一姑兮一水而一火合千載如符節兮夫奚分乎彼
我痛齊民之薄媮兮孰姬姜而至性子耄耋有德色兮
何惑乎婦安常而掉磬彼箴管纖縵之猶有私兮況髮
膚與身命苟聞風而悉興起兮又何難巾幗而獨行循
燒垣以周視兮痛煨燼與燂魚猗一杯之焦土兮行綽
楔之高標定孝竹之生其墟兮兀冬春而不凋歷萬齡
而聳幹兮障炎颺於太霄

韓愈陸渾山火詩天跳地踔顛乾坤又
燂魚煨燼孰飛奔又炎官熱屬朱冠禪

丁奕墅哀詞

君諱昌瑞字奕墅予兄之子壻也子襄精敏弱慕儒宗
孝公貪書長嫻經術自隸博士益勤修業僻處鄉曲罕
接勝流並時經生撫華忘實君獨嗜古殫精振奇聞有

良書飢渴購讀羣經故訓諸史軌範文章流別百氏塗
軫環絡窺研略皆淹貫卽其經藝已足冠時重親在堂
有藉祿養屢充秋賦奇隻不偶侘傺沈屯積成銷鑠喀
血而終怛化之時眷戀遺籍湛深溺苦標尙可知電碎
霜凋室眺衢歎予忝戚黨且符志趣搯腕悲悼尤倍恆
情撤涕濡豪爲之哀詞曰

猗翩鸞之下儀兮羌有叱而有翔彼旃檀之醇醑兮乃
或沈而或揚緬元造多舛迺迺視我辰之所當儵蘭葦
而芝焚兮淚沾膺而淋浪眾鱗集而龙聒兮競制舉之
邁鶩甘齷齪而骫骳兮跼壽陵之故步卓子志之英絕

小謨觴館文續集注卷二 二十一

兮投高軌而遐赴振孤蓬於羣麻兮寶雖彝而斥瓠稽
成博之古諸兮騁連犴於學林軸充箱而照軫兮寢饋
哀而浸淫爛崑圃之夜光兮探驪淵之千尋割膏腴而
入鞠兮中莖韶而奏音嗟純鉤如列星兮世何人其辟
燭絜驟裏以服襄兮痛明珠之彈肉犴椽欒而婁頓兮
韜量采於和璞俄修夜之不暘兮萌咎徵於賈鵬當廢
牀而去瑟兮猶縹緲之繫情傷析薪之乏荷兮夫誰發
乎晏楹念奇意之弗終鬱兮或曠雲而霄征將儕眞靈
而賦新宮兮招君魂於紫庭

漢書儒林傳丁寬字子襄讀易精敏 孝公已見卷
二注例不復出 劉合爛悼外徐惟文電碎春紅霜

獨夏綠 師曠禽經鳳靡鸞叱百鳥廢之注鳳死曰
靡鸞死曰叱 莊子秋水篇子不聞壽陵餘子之學
行于邯鄲歟未得國能又失其故行矣 羅泌路史
因提紀命明繇政乎陞級畢旒辨乎方色成博受乎
古諸隕齒錄乎延禧四后職而天道平人事理
越絕書王取純鉤辭燭觀其珮爛如列星之行

洪北江先生畫贊 并序

夫元精耿貫故緹油之業彰焉光岳孕正斯琨玉之操
勵焉是以勁節峻峙多兼閎達之學鉅儒魁壘必裕骨
鯁之氣然非邁際軒姚蓋容天地盛陵媿邁扈之治豐
刻几勒虞之規宇宙爲心山淵恢度則秋霜懍皓與明
月而同碎崇蘭郁烈入委灰而不芳又何論乎曾史碩
德游夏文藝鼓鐘寰陬茵藹竹帛也哉先生姓洪氏諱

小謨觴館文續集注卷二 二十二

亮吉字稚存陽湖人也幼挺涪至早標峯崖九齡而孤
侍母浮寄仇氏嚴擁楹之訓子輿軫楹臂之感幅將畫
正沃瀚其教星奔雨泣幾隕其生固已絕跡高軌天懷
發中摯性越於臯魚巨孝稱乎江革矣學成道通洞經
綜史析蒼法之隱暖究聖壺之阻奧邱董萬古裁制於
清衷乾坤兩戒牢籠乎指掌謨著蠡出富於縣巖之積
纓褐豔仰過於北面之宗旣乃去卑溲翔閭衢待詔金
馬通議白虎珥彤紬書校理窮匱室之祕握蕩蓬遜士道
術被參井之區循其階資緼以年歲榮牒顯級翹足可
須而先生以爲行義者前哲之上務文章者報國之餘

事思竭謇諤之忱用禱塞晏之化龔值

天子席蘿嗣構闢纘納言復旦方歌刑干猶舞濟師者
遲撥鬻刺蜚之績聞捷者厘虛鼎繆彰之慮感發蒿目
誠切披肝又以執白簡而抨事同出位伏青蒲而諍職
異南司爰迺騰書鈞衡冀達黼辰亢激既過狂驚遂忘
勳華幾敕忽陳弼違之詞賡颺運隆遠有宮鄰之戒僉
謂罪儕誣罔分合灰釘先生亦負鎖煎膏靜待嚴讞風
神元定處之彌泰卽其志膽固冰願鼎鑊矣伏遇

聖主大德容下暢垓泝埏曠蕩推恩吳綵宏量恐杜獻
替之路并寬左校之輪宥以遠方曲加含貸於是夸父
禹彊之域梯棧前蹤革抉啖芮之儔札緝就列濯靈襟
於伊麗之海聳壯矚於祁連之山將謂老烏孫之庭絕
玉關之入淪浹荷戴已足平生而

當山寤寐嘉猷延伫忠實屬有桑林之禱載懷衢室之
問念汲黯妄發義歸愛君任座抗行益彰主美隨沛維
竿之赦俾免馬角之戚尺一初頒寸霖驟霽叩心非鄒
衍故繁霜不飛雪寃異東海而旱魃立解因復演繹諫
牘儷諸巾机之銘覽思苦言更廣旌鼓之設汪汪平蓋
緝萬嗣揚洪徽扇懿鑠已昔崆峒順風之請華封乘雲
之拜咸稟叡哲采言芻輿羸劉以降亦聞側席引裾折

檻前規可臚然未有跡涉詆譎論非封事不辟丹墀之
戟逆過批鱗如題朱雀之門咎踰齒馬而能受同藥石
佩比韋絃藪納川容嘔符嫗掩彼晉武宏裕弗貽劉毅
之誅漢祖深仁無恚周昌之直以視今日何足萬一相
方哉然則先生節概古人有之先生遭逢古人未覲也
烏虜偉矣旣歸家術字曰更生百軸千函定藏山之裘
春林秋澗和擊轅之歌勝流奉爲嵩衡薄海瞻爲模楷
兆蓀較晚捧手忝預攬環聆卷霧之飛談挹籠霄之勝
氣審司農之卷誦覽八千見扶風之堂門徒四百梁摧
奄及曾不憖遺先生長君飴孫榮郁繼聲後先濟美劄

小謨觴館文續集注卷二 二十四

石揚善碑誄林立復出遺像徵及鄙文夫樂陵曼倩孝
若興異代之思東府希馮子淵有古賢之頌況於承接
音塵周旋喬梓昭銘景行敢謝拙詞因作贊曰
不朽有三德言卓爍楮柱彝常淹貫邱索延陵雄腴川
壤礪礪資淑蘊英先生爰作孤露遇屯煦濡母令剪鬚
書陳鳴機銓映誠動噬指毀鄰滅性儀型參騫方軌薛
孟電飛景拔移孝成忠豕涉學覈駢原選公意雄履虎
地隔乘驄猥以詞臣蹇杼匪躬鮑恢抗直鶉鵠貞讜史
效獻規危寧觸網瓦石獨含樞梗孤往命輕鴻毛義貴
熊掌優繇亭育靈囊大包苛除燒解虔鞏謙勞虛左謫

木高懸戒鞞薄謹過釋渥澤醴膏坎穴化夷焦原坦步
隼逝颯迴繩行沙度亮跡遐欽傳書湧布典語法言玉
栢繁露東觀接武守缺保殘疇宏述作楛逸窺刊呪訾
塞默醕漓樸剗疇樹風檢吐赤傾丹昌辰幸丁馨烈遙
駛永世作程穀詒綿祉貌留丹青名炳圖史隙駟雖狙
聞風庶起

隋書音樂志道周經緯功格元祇方軒邁扈比舜陵
媯鬻子上禹政篇昔大禹以五聲聽治爲銘於荀
簾曰教寡人以道者擊鼓教寡人以義者擊鐘教寡
人以事者振鐸語寡人以憂者擊磬語寡人以獄者
揮鞞也齊書高帝紀贊同度量宇宙合量山淵任
昉王文憲集序汝郁之幼挺滄宇黃琬之早標聰察
曾何足尙司馬昞墓志銘神峰魁崖機悟卓絕
集韻仇止兩反孟母仇氏劉向列女傳孟子閒居

小謨鴈館文續集注卷二 二十五

擁楹而歎孟母曰擁楹而歎何也孟子曰道不用于
齊願行而母老是以憂也孟母曰夫死則從子禮也
子行乎子義吾行乎吾禮王充論衡曾子出薪于
野有客至曾母卽以右手搯其左臂曾子左臂立痛
卽馳至列女傳敬姜曰夫幅者所以正曲枉也不
可不彊故幅可以爲將畫者所以均不均服不服也
故畫可以爲正酈道元水經注河北有層山懸巖
之中有石室室中若有積卷世士罕有津逮者謂之
積書巖魯相韓敕造孔廟禮器碑自天王以下至
于初學莫不驥思歎印師鏡潘岳關中詩虛島滿
德謬彰甲吉李善注滴甲二羌號德吉其名也言虛
明誅二羌之功張衡東都賦始于宮鄰卒于金虎
李善注言小人在位比周相進與君爲鄰卒于金虎
聖若金讒誦之言惡若虎也袁宏三國名臣序贊
神情元定處之彌泰後漢書李膺傳反坐輪作左
板呂氏春秋求人篇大戎之國夸父之野禺彊之
所積水積石之山戰國策甲盾鞮鑿鐵幕革抉跋
芮無不畢具注以革爲射決跋與敵同謂楯也抉謂
繫楯之紛綬戰國策王身自削甲札妻自組甲緝
管子桓公問堯有衢室之問者下聽于人也孔

融薦禰衡表任座抗行史魚厲節殆無以過也李善注呂氏春秋魏文侯問諸大夫寡人何如主任座曰君不肖君也翟璜曰君賢君也臣聞其主賢者其臣直是以知君之賢也江淹詣建平王上書昔者李臣叩心飛霜擊于燕地庶女告天振風襲于齊臺李善注鄒衍盡忠于燕惠王惠王信讒而繫之鄒衍仰天而哭正夏天為降霜漢書于定國傳太守論殺孝婦郡中枯旱三年後太守自祭孝婦家表其墓天立大雨路史疏仇紀黃帝有中机筮管子桓公問舜有告善之旌伯立諫鼓于朝班固典引將絳萬嗣揚洪輝奮炎景王融永明九年策秀才文是以崆峒有順風之請華封致乘雲之拜漢書東方朔傳是時朔陞戟殿下辟戟而前曰董偃有斬罪三安得入乎淮南子倣真訓積惠重厚累愛襲恩以聲華嘔苻姬掩葛民百姓使知之詐訖然人樂其性者仁也晉書劉毅傳帝問卿以朕此言今有直臣可方桓靈帝大笑曰桓靈之世不聞此言今有直臣故不同也史記周昌傳昌嘗燕時入奏事高帝方擁戚姬昌還走高帝逐得騎周昌項問曰我何如主也昌仰曰陛下即桀紂之主也於是上笑之晉書

小謨鴈館文續集注卷二 二十六

劉恢韓伯傳論勝氣籠霄清談卷霧後漢書鄭康成傳事扶風馬融融門徒四百餘人夏侯侯東方朔畫贊魏建安中分厥次以為樂陵郡故又為郡人焉後漢書周磐傳蔡順少孤養母嘗出求薪有容卒至母乃噬其指順即心動馳歸後漢書鮑永傳乃辟扶風鮑恢為都官從事恢亦抗直不避疆禦晉書傳元傳五等建封鶉觚男贊曰鶉觚貞諒實惟朝望太元經次五靈囊大包其德珍黃注五居尊位包有四方如有囊之所裹括也漢書鼂錯傳陛下配天象地覆露萬民除苛解繞寬大愛人注燒頰擾也音如紹反後漢書班固傳典引乃始虔聳謙勞兢兢業業注虔鞏固也言帝固為勞謙也

黃忠節公書贊 并序

嘉慶昭陽作噩之歲涂月嘉定盛明經薰以其鄉先生黃忠節公所臨于祿字書勒石拓示勁骨端嚴毅力蟠鬱楷模魯公蓋由貞軌亮跡神明相契非在點畫波磔

間矣兆菘近公之居誦公之書比復見公所著日記悉
公研幾克己之密淵入聖域精兼梵修此中湛然同符
大化其碩學偉詞成仁授命特性分發見之一端耳展
誦翠墨如接光靈再拜贊敬而爲贊曰

虹光燭霄正氣出指盈牘鋒稜千尋壁峙公文彪炳公
節雷碾存養有本心源微茫大輪小乘旁研洞鏡歸諸
孔顏窮理盡性無入不得隨變所遭鋸鑊飴視靈臺弗
搖巍峩膠址珍爍遺翰互歲綿齡星芒雲爛

釋皎然達摩法門義贊我師西來
傳乎真訣大輪當路小乘亡轍

鮑貞女曠銘

小謨觴館文續集注卷二 二十七

鮑貞女者固始人也自其亂歲許字董氏值歲大祲鬻
身爲傭墨車無堂著之俟谷菴有化僑之歎流轉遷徙
入於吳門沈觀察家觀察時牧許州傅厠臧獲精慧趨
事潔白範身馴至弱笄將謀擇對女乃長跼涕泣自陳
衿纓之繫屬當年有夫禽幣之委輸今日無二主雖有
命弗敢以從曲喻再三瀝血自誓觀察高其義憫其情
於是出零丁之帖爲求故雄占遲歸之爰以蘄終吉旣
而耗問沈寂存沒間阻女遂矢志秉節以終內存匪石
之固外絕白圭之玷酒漿醢醢勤職於輝胞芳澤璣珎
不關於念慮冰潔霜整歷卅餘年觀察第五子中立子

妹背也既傾乾蔭家落屢空女依以居忠謹奉役餐荼
堇而無悔葆松筠而益堅姻黨傾風扈養起敬行年五
十抱疾長畢夫頌陶嬰之操猶屬既昏傳伯姬之貞蓋
由貴胄女以庶賤生長草萊目不覩詩書耳不知今古
師心率已蹈德成仁豈非稟懿三靈天知自致者歟中
立既經其喪復爲卜兆於某原屬志幽宮以彰朗節夫
西道縣治之里曾表龍憐東京墓闕之文亦傳羅鳳變
禮合義於法宜銘辭曰

猗淑質生貧辛壁蠲潔蘭馥芬丁游饑失所天役笄帚
屏羅紈志守一安笄單聞媒灼哀泗潛四十載持身全

小謨觴館文續集注卷二 二十八

睽春花落無言懷正氣罹膏肓遽殫殢悲奩傷留清白
垂篇章刊石銘永億年

蔡邕青衣賦精慧小心趨事如飛 案東漢戴良作
零丁 晉鈕滔母孫氏公孫夫人序贊夫人資三靈
之清懿誕華宗之澄粹行高冰潔操與霜整性揚蘭
芳德振玉穎 晉湛方生上貞女解伏見西道縣治
下里龍憐年始弱笄志存匪石之固行無片言之玷
憐葢草萊之婦人耳目不聞今古
之說師心率已蹈茲四德抑可謂稟靈山岳自
然天知者矣 洪迺隸釋有貞女羅鳳墓闕

文林郎署蒙自縣知縣尤君墓表

君諱維熊字祖望長洲人也曾祖怡以詩名學者稱北
田先生祖巨源增廣生父世楠乾隆乙巳恩進士就職
州判舉孝廉方正授六品服行爲國植學爲士楷矚思

歎卽萬流翕然君夙滿義方長擅才筆奇章秀句風飛
川涌以乾隆乙酉拔貢生授淮安訓導秩滿膺薦簡發
雲南知縣攝宰蒙自地當蠻獠俗窳言屨始惟彝獮所
居今則寄莊竝轄其民田客主旣襍姦利叢生乾沒侵
牟術取勢脅土著之生計日蹙僑人之隱占難稽弱則
含茹強則訐訟君乃躬履鄉落釐定畝區阡陌鱗分戶
口秩若經界旣正貪冒不行杜爭一邑溥利百世其土
習荒於嬉或暱胥徒其農工商溢於利多至黜媢君乃
作四民之箴爲月吉之讀鳴臬不鳴桀黠咸化又以民
獠孱錯輕起相牙欲以古儀俾之觀感乃舉行鄉飲酒

小謨鴈館文續集注卷二 二十九

禮肅賓於斯禮成於晡揖讓雍穆童髦欽瞻誘掖浸淫
器競衰息君謂人心終古不弊教典終古可行俗吏迂
之識者趨焉君之官時先德猶在子舍萬里煩腸九迴
紆鬱嬰疴移疾適返歸甫期歲遂丁艱棘黎儀傷瘁益
不自聊越五年而君卒時嘉慶十四年四月也年四十
有八君神識通明機悟卓絕詞翰之外兼長幹局婁爲
節府延典箋奏在官無一年鄭阿之譽洽於萬口前內
閣學士尹公時方在籍尤亟稱之生平篤倫紀厚交游
外若通脫而內守廉隅細行不具書書其大者君始以
雅材眇眇馳藻藝林後乃寢繩履程棲貞宅正將以還

澗反樸匡俗濟時希賢詰之高燧光胎穀之潛曜天不
假年未竟初志怛化之日僅舉詩詞屬爲點定今陳大
令鴻壽爲刊於溧陽嗟乎世可見者止此而已予所知
者蓋有在也子二培均皆習儒業克承其家旣葬矣思
琢元石以篆遺德爰爲之文而系以銘曰

以爲才士而醕儒以爲能吏而良師牛刀一試天南隅
涵停秩積蘊未舒遺書寸袞鏘瓊琚真知者誰吾涕泗
洪适隸釋堂邑令費鳳碑聚儀瘁傷涕泣漣漣懷
令李超墓志銘棲貞宅正寢繩履程韓愈太原王
公神道碑銘秩秩
而積涵涵而停

署京口營副將京口左營遊擊吳公墓誌銘

小謨觴館文續集注卷二 三十

公諱坤字振華姓吳氏其先由常熟遷太倉遂爲吾邑
人昔西京番令媿駿烈於韓彭東漢忠侯儷威名於耿
賈珠鈴玉帳夙秉宗風劒氣弓聲家傳闔寄公生而軒
特長益魁奇武節剛方筋骨秀出參連劔注射法本於
天弧方卦圓著營圖原於太乙深識九變妙察六韜校
旗而審軍容望塵而知敵數宇文深累石作伍卽解指
麾辭世雄畫地爲城便爛攻守拔身隊率入選材官以
捕洋盜功補劉河營右哨千總地當海若孽有水僊獨
以熊豹之姿深入鯨鯢之窟衝波畫鷁不避銀山沸鼎
游魚咸歸鐵網乾隆五十一年臺灣林匪滋事檄統

卒轉餉軍前擊楫以行破浪而去黃龍青雀海童懾琅
鐸之聲赤豹文螭山鬼避星旄之色乃得方舟輓粒泮
水蜚芻甲士飽騰針程迅駛以視寇恂河內之輸宣武
金鄉之運蕘虞既倍勞績尤殊歸膺保薦擢劉河營守
備復以協獲鄰境盜功遷高資營都司攝上海營遊擊
令嚴宵肅中天之明月孤懸烽息桴停如練之澄江自
曳時兩江制府書公孫公後先秉節角試程材觀白茶
丹火之容動細柳長榆之想爰以國爪洊陟高牙嘉慶
元年授京口左營遊擊三權本營副將事彈壓滄瀾綏
救湖海吳根越角心規成掌上之形火艦風船手畫定

小謨觴館文續集注卷二 三十一

師中之律班聲殷地秋高而陣肆羶劉巨浸稽天颯怒
而防嚴鯢渚領南徐之雄鎮乘北府之樓航徼巡於鼇
背鯤身出入於蛟涎蜃氣警先芽孽奸靖桂蒲文鯨不
飛鯤壑之蜺幃影靜腥鰐咸戢魚麗之鳧藻歡多方將
鉦鉞昭榮形盧袞錫而雅慕沖挹謝拙邱園遂以老疾
乞休卜居東郭幅巾窮巷有羊公白士之恩匹馬郊亭
無醉尉霸陵之憾綠沈金鑲忘舊日之將軍雪刺霜豪
作太平之父老師貞丈人勞謙君子葢兼之無愧矣公
勤以練士仁以馭徒緝札精嚴戈鋌犀銳程其寒暑勞
逸同其飢渴安危謝尚則躬自分孺鄧訓乃身爲耄藥

鄂軍家事悉關公緯之懷衛卒更番願報寬饒之德以
故裨弁偏校騶卒鈴奴雖當釋絨閒居猶復心歌腹詠
立燕齊之社共憶欒公騰酒脯之謠難忘祖述生平敦
任卹崇樸涓進止撝恭被服儒素婁師德河蘭大帥獨
傳長者之名馬文淵浪泊豐功恪守善人之戒嘉慶十
三年月日卒於里舍無疾而終五更鼓角望猶重乎龍
驤一夢瓊瑰兆驟符乎狸脈何怪乎虞歌引路水犀同
勞面之哀大樹凋霜樞馬振驚星之響也哉公生於乾
隆十年月日年六十有四子二鎬湘孫應桂鎬喜聚書
尤善才譽晉侯軍尉育祁午之佳兒唐代將門得來恆
之才子陰德昌後其可慰已以嘉慶十八年月日葬於
石浦之原嗚呼燕領不封冢乏祁連之象馬鬣長在
墮淚看江漢之碑銘曰

小謨觴館文續集注卷二 三十二

右鉞垂芒天鋒示緯世有干城精符匡衛南沙挺英中
涓拔萃飲羽鳴絃絕塵馱轡風后烏雲軒皇鵬幟六術
五權參微洞祕攤鐸拱稽戈船下瀨易威以慈寓寬於
厲挾纊拊戎投醪洽惠望燾如歸瞻麾樂隸瀛島霾激
雲帆梗饋上賞弗邀恬衷自貴耀冕辭蟬縫裳愛芟竹
鳴支筇田翁把臂山情方曠壑舟遽逝舊部泗吡連屯
霄涕武達文通昌其賢嗣孰萃之倫視此幽隧

漢書吳芮傳秦時番陽令也甚得江湖間民心號曰番君 後漢書吳漢傳賜諡曰忠侯 李商隱謝尚書范陽公啟鄒氣弓聲割韓彭之右地 陳書高帝紀深識九變妙察五色以寡制眾所向風偃 五代史唐臣傳周德威能望塵以知敵數 周書宇文深傳年數歲便累石為營伍并折草作旌旗父永見之曰於後必為名將 隋書薛世雄傳為兒童時遊戲輒畫地為城郭令諸兒為攻守之勢 齊書徐孝嗣傳論凌風淫水轉漕艱長 後漢書寇恂傳拜河內太守時軍食急乏恂以輦車驪駕轉輸前後不絕 晉書桓溫傳溫北伐進次金鄉時水道不通乃鑿鉅野三百餘里以通舟運 後漢書禮儀志立秋武官肆兵斬牲之禮名曰貍劉 魚麗見左桓五年傳 晉書謝尚傳始到官郡府以布四十匹為尚造東布帳尚壞之以為軍士襦袴 後漢書鄧訓傳法東觀記曰吏人病瘧訓身為煖湯藥咸得平愈 舊唐書柳公綽傳鄂軍旣在行營公綽時令左右省問其家行卒相感曰中丞為我輩知家事何以報效故鄂人戰每克捷 漢書蓋寬饒傳初拜司馬躬察行士卒廬室視其飲食居處有疾病者身自臨問歲盡交代

小謨觴館文續集注卷二 三十三

衛卒數千皆願留共更一年以報寬饒厚德 晉書祖逖傳為豫州刺史百姓歌曰三辰旣朗遇慈父元酒忘勞甘瓠脯何以詠恩歌且舞 狸脹見左成十七年傳 祗午見左襄三年傳 唐書來濟傳父本驍將而恆濟俱以學行稱 鶡冠子天則篇前張後極左角右鉞 史記天官書杓端有兩星一內為矛招搖一外為盾天鋒 史記天官書環之匡衛十二星藩臣皆曰紫宮 荀子議兵篇制號施令欲嚴以威慶賞刑罰欲必以信慮舍收藏欲周以固徒舉進退欲安以重欲疾以速窺敵觀變欲潛以深欲舉以參遇敵決戰必道吾所明無道吾所疑夫是之謂六術無欲將而惡廢無急勝而亡敗無威內而輕外無見其利而不顧其害凡慮事欲熟而用財欲泰夫是之謂五權

國子監生吳君墓誌銘

君姓吳氏諱鏐字穎叔吳江人也秀氣孤凜馨逸夙成當聖童之年茹風木之痛銜索抱疚從燔含悲沫泣墮

心馳芬至性長益修飭動無適瑕衛叔寶之神清荀慈
明之外朗不攘六鑿寡欲五綦屏居小樓坐擁圖史博
昌六箸之經厭譚竹究宏景三層之閣但聽松風雅好
蕪花遂嫺寫貌步趨熙筌調冶鉛黛沒骨著紙穠春滿
堂口不言金錢手不捉珠貝惟於壁友珍等連城高似
孫之所箋洪景伯之遺譜露宵旭旦諦玩摩挲月窟潤
通元雲黜而下布玉池泉溢涵星粲以相輝於時刷滌
几格翦無纖埃澡滄襟情湛若止水蓮衣蘭佩章篋爲
逍遙之公琪草金徽周朗在羲軒之世百味無嗜獨耽
酪奴燻盞候湯妙具神解曲室晝謚閒庭景妍沈沈霞

小謨觴館文續集注卷二 三十四

腳展北院之一旗習習清風生玉川之兩腋素韻高寄
希蹤勝流由其胚孕潔蠲唾斥腥腐濯笠澤之波明琅
作質得天隨之性芝畹爲家仲宣體羸威明奄化神聰
蟻鬪咎徵鵬飛嘉慶十七年月日以疾遽卒年二十有
一君娶於沈時方有身君兄雲璈悼鳧沒之速極鴿原
之哀於是祝南孺子之男卜鄭小同之長旣以自藏宋
研納棺以殉復徵銘誄儲示遺孤挂延陵壠上之劒類
彼高懷碎子敬靈牀之琴同其咽塞旣而繡紉裏玉珍
珠帖纓弱女慰情鬢笄待誨是又小年織素未詠於左
思異日荆荊有煩於庚袞矣古者高士之傳不必擅雅

材獨行之史不皆著奇節卽其標格風尙足可矯俗勵
頑況乎讓瘦推肥分枝圻翼生共姜肱之破歿慟僧謙
之靈友弟行敦天倫宣範稱非無美銘法奚乖辭曰

高齒長檐綺襦紉袴少年之場跡弛罟駕君乃持躬謹
祛鷲謝邃氣汪容初芳佩麝蹴踘格五挾彈攜壺俠遊

之藪烏集鱗趨君乃守寂縹緗茗鑪映研道味靜協禪
擢泊如清操凝然元旨才薄佻華風懲倣詭電爍曇凋

霜摧綠委玉樹可埋幽光永燿

葛洪西京雜記許博昌安陵人善陸博法用六箸或
謂之究以竹爲之長六分或用二箸博昌又作大博
經一篇陶穀清異錄余家世實一硯形正圓背陰
有字曰璧友案洪适有硯譜高似孫有硯箋何

小謨觴館文續集注卷二 三十五

遠春浴紀閭林叔睿所藏端石下有鄭魁銘曰潤應
通月窟洗合就雲溪張世南游宦紀聞胡堂長伯
量記度常卿涵星硯云汲泉滿池粲粲相輝半月止
墨元雲黯黹而下楊銜之洛陽伽藍記彭城王曰
爲卿設茶茗之食亦有酪奴因此復號茗飲爲酪奴
蔡襄茶錄凡欲點茶先須焙盞令熟候湯最難
曹鄴故人寄茶詩碧沈霞脚茶香泛乳花輕虛全
飲茶詩但覺兩腋習習清風生熊蕃北苑茶錄次
日揀牙乃一牙帶一葉者號一槍一旗南孺子見
左哀三年傳唐張諤岐王宅詩玉女貴妃生嬰媿
始發聲金盞浴未了綳子繡初成翡翠雕芳褥真珠
帖小纓何時學健步鬪取落花輕陶潛詩弱女雖
非男慰情良勝無左思嬌花詩小字爲纖素口齒
自清歷晉書庾袞傳孤兒女曰芳將嫁袞乃刈荆
茗爲箕帚命芳曰汝將事舅姑洒掃庭內婦人道也
故賜汝非器之爲美欲使汝溫恭朝夕後漢書趙
孝傳弟禮爲餓賊所得孝卽詣賊曰禮
久餓羸瘦不如孝肥飽賊大驚並放之

亡妻蕙君蔣氏理銘

亡妻蔣氏字蕙君長洲人故康熙癸巳進士廉州府知府諱杲之孫乾隆乙丑進士兵部右侍郎入祀鄉賢諱元益之季女年二十歸於子事先考寧武公蘭階府君先妣孺人滑氏蔡氏婉愉祇奉咸皆慰怡繼而游丁閔凶兄嫫徂謝弱弟兆蕙庶母洪生洪又早逝子故產盡斥傭書客遊亡妻黽勉有無規畫鉅細撫叔如子壺儀秩然頗嫻詩書而吟咏不事謹節絲粟而膜臘必豐僕媪雖忤意無惡言樵蘇雖婁空無懟色安約茹勞心力瘳瘁時嬰疾疴卒就沈頓以嘉慶二十一年九月廿三日終於里舍年四十有七賦性明達綜理密緻度物庀事悉有常度鉛黛不御敝衣數紉視浮俗榮利泊如也蓋其先世累以清節偉望矜式中外亡妻孺染遺訓識近上流雖生高門不異蓬戶子卅年來胥疏江湖矜慎一介貧不隕穫賤無怨尤實賴亡妻是相是輔嗟乎嗟乎而今已矣卒之明年十二月十一日爲卜葬於先塋之右銜酸濡豪銘其埋曰

人閒累先我釋地下親先我卽百歲後應同穴刊尺軼
永埏室

河南懷慶府黃沁通判畢君墓表

君諱繼曾字承業又字研山前候補員外郎瀧之仲子

前太子少保兩湖總督沅之從子也資華崢門挺瀄髻
幼魯叔陵之經術扶疏于家庭王子淵之文詞卓越乎
黼黻年十七補縣庠生乾隆四十二年選拔貢生充四
庫館校錄鳳出丹穴將騰集梧之輝駒驥砥礪定騁箭
雲之足文與命迕屢見淹沈遂謝承明之廬屈就上綱
之任歷官河南山東州同通判房恭懿之能官美聲于
毗贊朱伯厚之疾惡幅魄乎茲猖在懷慶時沁河異漲
君集夫冒雨竭五晝夜力焚隄得完黃沁向設運料人
車吏索民累君爲裁減宿弊以除王尊當流犯難陽侯
爲之歛威劉頌息役利農綱領成於久仕卒以積勤致
嬰疾疴嘉慶十五年二月五日終於濟寧行館年五十
有四深源櫛沐之勞齊勤于臺僕威明殂化之痛淒極
于親疏天長景促吁可悲已君孝友肫篤內行盡倫始
以績學瑋詞冀紹前業終乃摧伏顛頓僅就中銓亭伯
文章位終邑宰公明才藝在止郡丞古人所嗟君同之
矣配劉氏子五人毓珍韞珍楚珍儒珍家珍以嘉慶二
十一年三月五日卜葬于州境潢涇之原毓珍等旣乞
其從父憲曾爲文志墓復屬予表其阡予與君孔李之
交誼敦于卯角京兆之試同歎于曝鯁追憶平生宛然
心目宿草車過流涕黃公之墟西隣日斜聲愴山陽之

笛輒復書石延垂後賢

後漢書魯丕傳關東號之曰五經復興魯叔陵 隋書房恭懿傳詔曰出宰百里毗贊二藩善政能官標映倫伍 晉書劉頌傳凡政欲靜靜在息役息役在無爲倉廩欲實實在利農在平糶爲政欲著信著信在簡賢簡賢在官久 舊唐書職官志尚書爲尚書銓侍郎二人分爲中銓東銓也 席豫高都公楊府君碑銘漢之崔駰官終邑宰魏之管輅位止府丞

祭亡妹文

維嘉慶二十有一年七月二十三日期功兄兆蓀以清酌之奠祭於亡妹湘蘅之靈嗟乎吾妹汝竟長往斷手折足無逾此哀汝素羸病屢危而安今茲綿頓猶冀全活冥茫真宰遽降斯酷吾門凋單連喪兄姊同母惟汝

小謨觴館文續集注卷二 三十八

又棄我去獨存奚樂觸懷皆傷汝七齡時隨父官舍夙秉神慧識悟超絕綺襦釵鐏閨閣所翫視如土苴獨耽詩書旁擅繪事其於文字流別古人性情妙解默契有過於吾訓遵無儀深自韜匿長歸於沈門穹族大汝能承順舉學親疏旣而衰落餐茹荼蓼人所不堪何況非習而汝怡然黽勉無懟相夫勗子俾忘其貧名列舉選聲問光著一門熙熙在約而泰支柱艱阨功歸汝身心謂淑德宜膺昌延何天不祐奪汝之速嗚呼理數究何可憑我父我母愛尤汝鍾孝亦汝摯懿質嫩行足光我家九原先靈今見當慰我丁孤露與汝同苦胥疏奔走

懽而獲存比十餘年未得返汝汝每思歸言輒於邑追
思痛疚但呼負負汝嫂之亡汝哭甚哀我恐汝病轉相
慰喻豈期汝喪纔距十月家有季弟長未見汝書來極
悲矧在於我我生不辰憂患叢集年垂始衰積若老髦
未知於世復得幾時旣已哭汝行復自念我無似續究
然孤危汝雖先逝門業有賴冥途思我必還累歛汝病
方劇我客大府出入之限略等關圍省視湯藥祇得數
面咫尺閒阻未視彌留聞耗馳慟亦復何及汝逝之夕
節樓鼓嚴戒閤留鑰哭汝而返展轉夜闌魂入我夢仿
佛言別覺而洶沲稠人眾中強勉酬荅空齋靜念淚曷
能制茲距汝歿廿有八日雪涕致奠悲不成文九地九
天汝於何所靈當來歆鑒我酸惻

李商隱祭徐氏姊文
斷手折足厥痛非擬

某卿遺草跋

文學畢君楚有吾友季瑜孝廉之次君松心孝廉之仲
弟也劉略班藝博綜於觴辰夕桀重差笏研乎綴術咸
謂騏驥致遠爾犢負重而童烏之元方與赤蚪之版遽
來遺詩叢殘得諸故篋瓌詭惠巧折裂騷牢片羽碎金
無慙作者季瑜悲深夷甫慟過陽元手其寸編授子論
定竊以蘭芽茁茁風雨奄其摧殘夏綠春紅霜雹於焉

凋碎由來夙悟多，渺遐齡觀其怡悵。述情朗麗哀志歌，
離弔夢海思雲愁。固已芥視浮生，蟬蛻穢濁蓋長沙賦。
鵬早知合散之因子，晉吹笙別就真靈之業矣。夫心在
影徂幽冥，弗隔彼瑤瓊。夜月青箱臺城之詩，綺輅魚車
少霞新宮之碣。次君慧業，殆其等倫。人間可哀天上差
樂，卽茲賸馥足證仙心。聊假齊諧之談，以釋倉舒之痛。
可乎哉。

沈括夢溪筆談求星辰之行步氣朔消長謂之綴術
北齊祖亘有綴術二卷 張讀宣室志進士陸喬友
見一丈夫曰我沈約也呼左右曰往召青箱來曰此
吾愛子少聰明因誦其過臺城詩曰夜月琉璃水春
風卵色天 魏志鄧哀王冲傳字蒼舒
年十三疾病太祖親爲請命及亡哀甚

小謨鴈館文續集注卷二 四十

孫古雲四十初度序

夫鑿坏負釜詭激戾乎經，兼朱重紫熱烈乖乎道。惟夫
得天元純，囊括道器，薛袞一致浮雲，無心進則豐貂高
蟬，仰齒圭組退則翔鴻，蟄蠖卷跡氛囂，瓔環不羈巾褐。
無悶是則韞贖恬漠，趣近懸解，可以得薪保耀，識眞全
年者矣。古雲襲伯方琮有光圓璧，無類以平津之胄，紹
景風之封，當其頡頏。金張焜熿，帶礪小侯，捧手大橫，佩
刀甘泉，長楊俠侍乎六，蚪期門羽林，並馳於四校，雲搏
水擊，葉矯風憑，宜春陰之號，儷其華資，長羅射陽之
褒，方茲尊遂，及乎收簪解錄，結宇依林，迹塵鼎鐘，思在

